

東
華
續
錄

東華續錄

同治六十三

臣王先謙敬編

臣張式恭恭校

夏四月甲申朔諭軍機大臣等蘇廷魁奏銅鉛船隻改由河運請飭山東省迅撥運河挑工另案工程經費一摺黔省辦運京鉛近因江路疏通仍照舊章由四川重慶江南儀徵以達通州此等船隻笨重甚於米船若不將運河淤淺段落妥爲挑挖誠恐銅鉛到境致有阻滯京局鼓鑄關繫非輕且本年江北漕米雖已停運而小米暫船及鹽斤軍火船隻仍須行走乘此大汛未交正可將另案工程及時擇要興修所有該河督前次奏請飭撥另案銀五萬兩挑工銀三萬兩著丁寶楨督飭藩司迅速如數籌撥解交蘇廷魁以便將要工趕緊興辦庶於京鉛北上不致貽誤毋得視爲具

文原摺著鈔給閱看將此諭令知之○升廣東陽江縣爲直隸州
轄陽春恩平開平三縣改陽江縣原設知縣縣丞敎諭典史等官
爲知州州判學正吏目○乙酉諭軍機大臣等庫克吉泰等奏官
軍攻克臨平賊巢見籌剿辦情形一摺劉松山等軍奪回董村後
復會同郭寶昌等進攻臨平賊寨立將辛店等圍寨數十處攻破
斬獲甚多譚玉龍等節節東追埽平菊村一帶賊巢辦理均極奮
勉見在賊股竄過咸陽勢將由三原東窺同朝著庫克吉泰德興
阿喬松年分飭各軍迅圖截剿仍須步步爲營穩紮穩進不可稍
涉大意該逆不得逞志於秦必將竄擾晉省完善之地著趙長齡
督飭陳湜認真防範毋稍疏懈喬松年另片奏劉厚基等剿平鄺
州土匪查拏段登雲滋事勇丁將向得勝等正法首犯羅煥祥勾
匪抗拒亦經擒獲正法並剿平大荔等處刀匪鄺洛人心已定所

辦甚妥仍著督飭地方文武員弁隨時稽察毋任再有煽惑以靖
地方將此由五百里諭知庫克吉泰德興阿喬松年趙長齡並傳
諭陳湜知之○丙戌諭軍機大臣等楊岳斌奏請調王仁和一軍
回省防剿等語甘省河狄一帶回氛逼近省垣李助發一軍在紅
土窯失利鹽固靜會諸逆擾及通渭馬營等處南路防軍不敷分
布省城附近要隘無營可紮勢甚空虛王仁和一軍本由楊岳斌
派往肅州替出成祿所部迅速出關見在成祿圍攻肅城卽日可
拔出關旣須暫緩著該提督卽與黃祖淦專意攻取其王仁和六
營改調回省以固本根肅州鎮總兵員缺卽著黃祖淦暫署俾專
責成所有黎獻移交王仁和之六旗勇丁並著成祿另行派員統
帶防剿甘州一帶逆匪楊岳斌俟王仁和一軍回省後卽行相機
分布將近省回逆剿除疏通糧道毋稍延緩將此由五百里各諭

令知之○撥福建駐防官兵五百餘名移紮杭州並增協領一佐領二防禦二筆帖式一暨委前鋒校領催委前鋒馬甲各額缺○予甘肅陣亡總兵官程尙友祭葬世職○丁亥諭內閣據趙新等奏上年十一月自琉球回權該國王尙泰懇請代奏令陪臣子弟四人入監讀書等語加恩著照所請所有該國陪臣子弟四人俱准其入監讀書用遂其觀光之志○諭鮑超奏傷疾舉發請假調理一摺鮑超著賞假一箇月在營安心調理並賞人筏四兩交該提督祇領以示體恤○諭軍機大臣等鮑超向來勦賊最爲奮勇朝廷相待亦推心置腹非尋常將領可比而見報傷病至此馳繫實深著李鴻章確查該提督病勢是否沈重抑或另有隱情卽行據實妥籌密奏儻傷病實不能支亦不能不量加體恤俾得安心調理該營勇丁人數眾多駕馭非易應如何派員管帶並著李鴻

章妥籌奏聞或與曾國藩密商布置以期諸臻妥協將此由六百

里密諭知之○吏部左侍郎基溥卒予祭葬○調阜保爲吏部左

侍郎轉崇綸爲戶部左侍郎調延煦爲戶部右侍郎以瑞聯爲盛

京兵部侍郎

由內閣學士遷

○戊子諭軍機大臣等何瑄奏擊賊獲勝收

復哈密城池一摺哈密旣經收復地方關繫緊要文麟景廉皆係

該城辦事大臣若再託故遷延不卽赴任萬一再有變故卽係該

員等貽誤著穆圖善成祿迅催該二員星夜兼程赴哈將防守及

善後事宜認真經理儻敢規避不前定當從重治罪並著成祿迅

拔爾城刻卽帶兵赴哈布置西征事宜毋失機會成祿等未到以

前仍著伊勒屯何瑄隨時防範以杜賊匪回竄巴城糧食短缺前

已諭令楊岳斌飭安西敦煌等處籌撥倉糧運解何以何瑄屢次

催提該縣等竟以未奉總督文檄爲詞藉端推諉著楊岳斌嚴飭

該州縣等趕緊撥解不得再有延誤並著成祿就近檄催敦煌縣籌撥京石糧一萬五千石解送伊勒屯何瑄軍營以贍兵食緩遠城前次指撥巴里坤餉銀十萬兩卽著福興桂成迅就見有之項儘數撥解如綏遠解到之款不敷應用李雲麟存畱榮全由俄國解回餉銀著卽酌量撥給伊勒屯何瑄以濟要需至札薩克郡王伯錫爾被害情形有無子嗣著伊勒屯何瑄確查具奏將此由六百里諭知穆圖善福興桂成楊岳斌李雲麟成祿文麟景廉伊勒屯並傳諭何瑄知之○已丑諭內閣大學士周祖培持躬恪慎學問優長由翰林洊擢正卿疊司文柄受三朝知遇之隆簡任輪厓管理部務均能無忝厥職朕御極以來念其宣力彌勤益加倚畀前以微疴賞假數日方冀調理就痊遐齡永享遽聞溘逝軫恤良深著賞給陀羅經被派睿親王德長帶領侍衛十員卽日前往奠

酌加恩照大學士例賜卹任內一切處分。○開復應得卹典該衙門察例具奏伊子舉人周文令著以主事用伊長孫候選主事周德祿著賞給舉人准其一體會試用示眷念耆臣至意尋子祭葬諡文勤○諭軍機大臣等譚廷襄曾國荃奏鄂軍擊賊獲勝並陳近日軍情一摺賊眾謀渡襄河經礮船晝夜擊退折回鍾祥京山境內攻撲阜市經姜玉順在胡山寺方家岡包鈔獲捷生擒長髮老賊嚴畏先等多名其九里岡龍尾山等處以匪亦經劉維楨熊登武等各率隊伍擊剿均有斬獲見向郢東驛黃家集一帶奔竄著曾國荃督飭各軍認真剿洗毋稍鬆勁鮑超患病甚重昨已賞假調理其所派宋國永等軍移營八條港霸王山屯紮並著歸曾國荃調遣令其會同鄂軍奮力殺賊李昭慶劉秉璋等淮湘各軍均已抵鄂著李鴻章飛檄該員等分路布置合力痛殲不得稍

分畛域以期迅殄逆氛左宗棠已由德安拔營著仍遵前旨西進其劉典所部數營卽令暫駐鄂境會剿以厚兵力將此由六百里各諭令知之○庚寅諭軍機大臣等趙長齡奏捻回直趨同朝防堵情形調馬德昭協防各摺片捻回分股圖由同朝入晉同州郃陽已見匪蹤晉省沿河地方到處喫重趙長齡已派遣員恆祐王溥分赴保德永甯等處防堵並添調營兵練勇交蔣臨照分守東灘一帶著卽飭令實力巡防不得有名無實河津以下一帶密邇匪蹤情形尤爲喫緊著卽責成陳湜嚴密堵禦毋令賊蹤竄渡渭洛兩河船隻業經陳湜飭令水師押出黃河其韓城等縣黃河西岸民船並著趙長齡喬松年飛檄該地方官押令移泊東岸儻有徇縱抗違之官紳卽著遵奉前旨分別嚴參拏辦並由陳湜飭令水師將不肯移泊之西岸船隻概行焚毀毋稍姑息馬德昭一軍

著李鶴年卽日飭令拔營北渡會同晉軍協力防守鄂捻竄至德安勢將入豫陝捻亦恐竄出潼關李鶴年當迅撥一軍馳赴陝州閿鄉等處填紮以固西路之防晉省於陝鄂兩省竄捻均應隨時兼防不可稍涉大意陳湜擬令知府陳膺福總兵劉定發在湘鄉募勇千名並添礮船四十號著卽照所擬辦理同朝回捻喬松年當商同庫克吉泰等調派各軍趕緊剿辦不得任令東渡貽患鄰封將此由六百里各諭令知之○命大學士官文管刑部事○廣江西宜春縣學額十名山東齊河三名恩縣二名湖北應城四名○壬辰諭軍機大臣等昨據趙長齡奏陝西回捻各逆竄富平後欲以一股由同官繞北山渡黃入晉一股由富平蒲城趨韓城從龍門口入晉同州郃陽已見匪蹤等語晉省防務甚形喫緊趙長齡雖飭陳湜蔣臨照等軍分路嚴防而該省兵力未盡足恃且沿

河一帶地廣兵單守禦亦不敷分布若陝省無大枝勁旅痛加截擊勢將闌入晉疆貽誤全局左宗棠已由德安拔營著卽趨程前進星速入關飭令各軍認真截剿毋令一賊渡黃以保晉省完善之區是爲至要將此由六百里諭令知之○諭李雲麟奏西北軍情並北路情形自請治罪註銷木質關防各摺片西陲軍務未能速辦各情朝廷原所深悉見在辦法總須聯絡蒙古喇嘛等眾收集人心以待大兵出關乘機會辦其北路防兵之難恃厄魯特人眾之難制撫循駕馭務得其宜庶可收其效而祛其患該大臣仍須細心體察妥爲籌辦至所稱撤烏科之防裁伊塔之官畱索倫兵於俄國給厄魯特遊牧地各條雖均有所見而事關重大斷不能輕率定議朝廷籌度事機慎之又慎該大臣不可遽行宣播伊勒屯前奏各節並未傳旨飭責該大臣逐條置辯未免負氣目前

哈密業已收復所有巴里坤哈密等處該大臣尤當聯貫聲勢
籌兼顧不得狃於成見視同膜外前諭該大臣將存留俄國餉銀
酌撥巴里坤軍餉仍著懷遵辦理總之該大臣當此時勢艱危之
日必須竭力補苴務求有濟非僅自請治罪遂可置身事外所請
加等治罪之處暫毋庸議其行營木質關防亦並無庸銷毀以資
鈐用將此由六百里各諭令知之○癸巳李鴻章奏臣前因任賴
捻股由黃郡西趨催調鮑超一軍由樊城迎剿據鮑超函稱傷
病沉重實難支撐聞賊有由安陸上竄之意擬派提督宋國永等
統帶全部出八條岡歸曾國荃就近調遣旋准曾國荃來咨捻逆
大股麇聚鍾祥之舊口京山之永澧河一帶必須霆鄂湘淮全軍
三面合圍再行進剿各等語臣當催劉秉璋李昭慶等分起前進
李昭慶於三月二十一日行抵德安卽帶王永勝董鳳高等進扼

京山之宋河劉秉璋周盛波亦由太湖宿松進蘄黃與楊鼎勳合
於麻城之宋埠二十六日進抵雲夢臣又飛飭劉銘傳由信陽入
鄂之應山隨州據報於四月初一二日陸續拔營是鄂省東北兩
面兵力已厚如安陸西北一路果有重兵扼擊庶可就地勢三面
兜圍以收聚殲之效茲接李昭慶三月二十七日由京山稟報賊
由永隆河郢東驛洋梓一帶上竄二十五日已竄過安陸府擾及
潛水溝豐樂河等處恐由襄棗之間復窺豫境見派開鳳等營馳
赴隨州之雙河扼紮但棗陽襄陽交界無兵攔截賊乘隙北趨駸
駸有出豫之勢臣部各軍一轉瞬間又落賊後可勝焦慮臣本擬
霆淮各軍進抵安陸上下分投扼紮漸偏漸緊剿辦較有把握臣
再馳往鄂境調度乃兵甫深入而賊又旁逸豫東空虛自須妥籌
進止昨安徽撫臣英翰來周口會商軍務臣與面議見屆麥熟捻

必回竄已屬其整軍出境互爲聲援又奏正繕摺間據劉銘傳馳報任賴捻股於三月二十七日已至棗陽之宋家集孫家集一帶恐卽由桐柏唐縣等處北趨劉銘傳與善慶馬步隊均於四月初一日改向桐柏一路探剿等語逆蹤剽疾異常一入豫境道路平曠無險可扼臣惟督飭各軍會商豫皖撫臣相機追截仍飭入鄂諸將領俟賊出境卽分道回豫更番休息以均勞逸再行穩慎進戰又奏頃據宋國永等三月二十七日自八條岡公稟鮑超病勢委頓急欲離營醫治請臣就霆軍將領中選員暫代等語此次鮑超引疾臣商詢曾國藩曾國荃如何辦法曾國荃覆稱見請宋國永唐仁廉等統營進紮仍望鮑超病愈親往視師曾國藩鈔示致鮑超信彙勸其力疾治軍與臣處致書慰勉之意均相脗合臣維鮑超身經百戰勞傷過重殊堪憫念惟該部三十餘營素稱得力

見值賊竄棗襄堵剿喫緊似應擇人暫代俾資鈴束合無仰懇
天恩准令鮑超在營安心調養臥護諸將飭就運軍將領中酌派
老成勇幹者一二員暫行代統進剿仍俟鮑超病痊親行督率以
示體恤而專責成 上諭軍機大臣等賊蹤剽疾異常見將由鄂
入豫李鴻章所調援鄂各軍又落賊後亟須跟蹤躡剿以遏兇鋒
著李鴻章曾國荃認真會剿毋令竄豫見居麥熟該逆四出掠食
亦在意中無論竄豫竄皖著李鴻章激勵淮楚豫皖各軍跟蹤兜
剿以戢狂氛秦晉邊防見均喫重應如何嚴密備禦之處著左宗
棠喬松年趙長齡妥籌辦理鮑超前派宋國永等軍協助曾諭令
曾國荃就近調遣李鴻章身膺統率著通籌全局妥爲調度以合
機宜一俟該提督病痊仍由鮑超親行督率以專責成將此由六
百里諭知李鴻章左宗棠譚廷襄曾國荃李鶴年英桂趙長齡喬

松年並傳諭鮑超知之○諭李瀚章奏遵查兆琛並未欺飾及覓
籌布置情形一摺兆琛一軍既據李瀚章查明並無飾敗爲勝各
情卽著毋庸置議李瀚章以李元度之師已偏荆竹園難於裁減
擬將周洪印所部萬人酌裁二千挑留精壯分布沅晃靖一帶以
固楚省腹地再由黔省天柱斟酌進取所籌尙妥楚省以剿爲防
自是正辦席寶田既屬穩練可以接替兆琛著於入秋後飭令招
募六七千人統帶進剿卽以周洪印裁勇之餉騰出應用劉崐計
當到任著斟酌情形會商妥籌屆時卽可令席寶田迅速前往替
回兆琛毋稍延誤至黔中兵餉兩窮不能不借資鄰省楚省援黔
自是力任其難朝廷惟求實效並不迫以近功然帶兵員弁仍須
隨時策勵庶不至曠日遲久徒糜餉需也將此由五百里各諭令
知之○諭穆圖善奏馳赴署任並陝回具稟投誠情形一摺蘭州

爲根本重地四面賊氛楊岳斌患病甚篤非得人前往鎮撫大局
實難維持穆圖善見令總兵胡世英統帶所部暫紮甯條梁兼顧
陝甘毗境並親率馬隊馳赴蘭州暫行接署督篆所籌尙合機宜
惟馬生彥等甫經就撫半箇城地方爲四達通衢甯安堡之防亦
關緊要該將軍務當督飭黃金山等密籌防守並將馬生彥等加
意羈縻不可稍有疏失左宗棠入陝後尙須勦辦捻股再議西征
甘省慶涇洮河等處回匪充斥穆圖善於省垣布置事宜稍有頭
緒仍當相機出省悉心調度勦撫兼施毋得株守省垣滋多貽誤
陝回于彥祿具稟投誠經該署督批令呈繳馬匹軍械卽著妥爲
開導俾知反正歸誠其河狄各處亦著飭令曹熙等乘機辦理見
時在甘陝回不無懷思故土之意惟與漢民積釁已深日後恐難
相容前諭左宗棠察看民情地勢於投誠匪眾妥爲安插該大臣

謀畫素裕務當體驗情形毋拘成見熟籌辦法惟此次與捻逆句結已經竄陝各回將來勢窮求撫仍不得率行收受喬松年有地方之責其於陝回應如何撫插之處亦著隨時諮訪與左宗棠咨商妥辦用靖邊陲原摺呈著鈔給左宗棠喬松年閱看將此由六百里各諭令知之○甲午吉林將軍富明阿等奏剿散東竄馬賊並將聚積金夫分別剿撫得旨秦蒙河匪徒雖經剿散仍須嚴防邊界毋任潛竄俄境金場竄出匪犯著富明阿督飭帶兵各員迅速撲滅不得稍形鬆懈洵金流民並著分別剿撫妥爲解散以冀邊境○丙申諭軍機大臣等曾國藩奏鮑超傷病甚劇請調員接統霆軍一摺本日已明降諭旨令婁雲慶前往接統矣婁雲慶於霆營情形尙稱熟習著劉長佑迅卽遴派委員接署古北口提督令婁雲慶交卸後由天津乘坐輪船前往江甯與曾國藩商定一

切速赴軍營庶靈軍有主持之人鮑超即可安心養病曾國藩李鴻章於雲慶到營後面授機宜令其妥爲接統認真剿賊以副委任至曾國藩所奏另募一軍在安慶訓練一節所籌甚是並著隨時籌畫辦理再行具奏直隸練兵亦關緊要如本省無人可派著劉長佑選員奏調以資臂助將此由六百里各諭令知之○諭庫克吉泰等奏近日軍情一摺劉松山等軍在三原等處剿賊獲勝賊由蒲城竄向同朝分擾邵陽大股仍踞同朝境上著喬松年嚴飭劉松山等迅速追剿不得徒事尾追再致延蔓河防萬分喫緊船隻雖盡泊東岸喬松山仍當嚴飭沿河地方加意巡緝並著陳湜小心防範毋令一匪偷渡逆蹤飄忽異常庫克吉泰等自應兼顧省門然總當隨機應變制賊死命不得株守省垣致滋貽誤將此由五百里諭知庫克吉泰德興阿喬松年趙長齡並傳諭陳

湜知之○廣湖南衡州府學額八名○予陝西陣亡翰林院編修
王鳳翔等祭葬世職○丁酉 上詣 大高殿祈雨○廣江蘇如

皋縣學額五名○予河南陣亡總兵官劉啟福祭葬世職○轉魁

齡爲工部左侍郎調恩承爲工部右侍郎以載鶴爲理藩院左侍

郎

由內閣
學士遷

○戊戌李鴻章奏劉銘傳於四月初一日督軍至游河

店探聞賊竄厲山一帶邊馬擾至桐柏境之四十里冲初二日賊

北竄黃土關大廟畝邊馬擾至譚家河西雙河距信陽東南四十

五里劉銘傳於初四日由游河復回信陽初五日進紮西雙河迎

頭攔截適周盛波周盛傳等帶隊由湖北應城趨應山初四日自

廣水驛出信陽武勝關賊銳欲東竄但防前敵有兵不虞我軍之

蹕其後也周盛波探悉任逆大股在臺子畝譚家河盤踞民圩牛

賴二逆在西山河李允踞平靖關初五日黎明周盛波等分軍三

路向臺子販進攻賊眾倉皇紛拒我軍槍擊矛刺斃賊極多層巒
疊嶂中賊馬不能馳驟大半棄騎徒步四竄我軍追至譚家河任
逆越山南竄畱悍賊守護民圩中輜重官軍併力殺入牛賴各股
自西山河率眾來援周盛波揮軍迎擊援賊又潰追殺千餘人周
壽昌劉啟福等入山按殺該逆繞向西南狂竄周盛傳追至平靖
關李允一股橫出迎拒又擊卻之劉啟福正追賊時見有黃鞍騎
賊越澗飛逃知係逆首賴汶泐策馬緊追被賴逆從騎回矛刺傷
額角劉啟福負創刃賊猶策騎直前連翻十餘嶺至蠟梅山地方
幾及賴逆叢林伏賊暗放洋槍擊中劉啟福腰腹旋即陣亡周盛
傳追至麻油店賊去漸遠始行收隊是日擒斬賊匪二千餘名奪
獲羸馬千餘匹陣斬汪老魁等賊酋十八名解散難民無數所有
疊次剿擒出力人員應請旨准臣查明奏請獎勵提督銜總兵劉

啟福身歷百餘戰所向披靡此次追擊賊首被槍陣歿殊堪痛惜
擬請飭部照提督陣亡例從優議卹以慰忠魂先據謀報捻逆因
東豫麥熟亟欲東竄掠食見被官軍扼剿折回鄂境將來或仍由
隨棗繞竄桐泌或圖由黃麻繞出皖西均在意中劉銘傳周盛波
等已自信陽分路入鄂劉秉璋楊鼎勳王永勝等亦由德安分起
北趨應山飭令相機兜剿如賊回竄豫境卽躡蹤緊追出鄂無任
該逆得稍喘息 上諭軍機大臣等該逆竄至信陽境內經劉銘
傳等軍分路奮勇迎擊疊獲勝仗剿辦尙爲得手在事出力員弁
准李鴻章查明奏請獎勵該逆見雖折回鄂境將來竄皖竄豫均
在意中著李鴻章督飭劉銘傳等軍相機兜剿譚廷襄曾國荃並
嚴檄鄂軍會籌堵蕩李鶴年英翰亦當嚴密布置防剿兼施毋令
再肆蔓延鮑超前曾力疾派員會剿甚堪嘉尙病體稍愈並著督

師迎擊用副委任將此由六百里諭知李鴻章譚廷襄曾國荃李鶴年英翰並傳諭鮑超知之○諭李鴻章密奏鮑超患病情形等語覽奏均悉昨據曾國藩奏鮑超傷病甚劇已有旨令婁雲慶前往江南與曾國藩商定一切速赴軍營婁雲慶到營後著該大臣面投機宜令其接統霆軍與湘淮各軍互相聲援以期迅殄賊氛將來鮑超病痊並著該大臣加意聯絡俾仍奮勉圖功以副朝廷終始成全之意○己亥以年逾九旬賞原任漕運總督袁甲三母郭氏扁額○予貴州陣亡署知府胡霖澍等祭葬世職○辛丑諭軍機大臣等楊岳斌奏慶陽圍解並縷陳東路軍情請飭穆圖善暫緩東行一摺前因楊岳斌奏病體難支老親皆在病中盼望情詞哀切是以准令回籍飭穆圖善馳赴省垣接署督篆茲據楊岳斌奏稱慶陽踞賊東趨城圍已解涇州亦無賊蹤惟甘省西南北

三路剿撫均須重兵省城存兵無多勢難分顧馬生彥等股肱經就撫甯安堡彈壓之兵實無可撥其辦理安插各務若遽易生手前去必致猜嫌叢生請仍飭穆圖善暫緩東行並原辦委員毋庸隨帶前進等語所奏自係實情穆圖善此時計抵蘭垣責無旁貸著將楊岳斌所籌體察見時情形妥爲布置不可稍涉疏虞河狄等地方應如何防剿安撫之處並須設法兼顧以固省垣甘事糜爛已極左宗棠公忠素著抵陝後諒必能統顧全局以紓朝廷西顧之憂也原摺著鈔給左宗棠穆圖善閱看將此由六百里各諭令知之○予甘肅陣亡總兵官楊甫宜祭葬世職○壬寅諭內閣劉松山自入陝以來屢著戰功此次追賊同朝復能會合各軍大獲全勝保固河防深堪嘉尚著賞給玉柄小刀一把火鐮一箇大荷包一對小荷包二箇以示優獎所部出力將士並此次各營出

力員弁均著庫克吉泰德興阿喬松年擇尤保奏○諭軍機大臣等庫克吉泰等奏官軍擊賊大勝情形一摺捻回各逆竄擾同州經劉松山等軍追及於晉成堡姜彥村等處疊獲勝仗大挫兇鋒勦辦甚爲奮勉逆膽已寒勢必急謀鋌走著喬松年督飭劉松山郭寶昌等軍嚴扼東路毋任擾及河岸庫克吉泰德興阿亦當嚴飭馬隊會合劉松山等軍實力兜剿以期一鼓殲除並著趙長齡督飭陳湜嚴密布置加意防範以杜賊蹤偷渡喬松年另片奏陝甘兩省在川省設局勸捐濟餉請將所收捐項凡甘省發照之捐統解甘省陝省發照之捐統解陝省以清眉目等語駱秉章穆圖善楊岳斌飭令局員遵照辦理惟甘省所捐止有領支一項恐收數較少如陝捐收項較多仍著喬松年隨時撥濟甘省列款作收以昭平允原片著鈔給駱秉章穆圖善楊岳斌閱看將此由六百

里諭知庫克吉泰德興阿駱秉章穆圖善楊岳斌喬松年趙長齡
並傳諭陳湜知之○諭前據李雲麟奏憑陳西北軍情敬陳四端
並再陳北路情形請速定大計等摺業經諭令該大臣仍妥籌兼
顧將原摺畱中備覽矣詳閱李雲麟所陳四條一曰西陲軍務未
可速辦二曰北路防兵決不足恃三曰棍噶札勒參宜慎用四曰
速保山西以全大局未嘗無可採之處除山西早飭各該督撫妥
籌外西陲軍務本難剋日奏效李雲麟節次辦理棘手朝廷未加
嚴譴者亦誠知事勢之難也惟所稱防兵有不如無賊來以不守
守之等語殊非悉心籌辦之法至棍噶札勒參一員不得已而用
之原當略短取長妥慎駕馭李雲麟謂宜虛參贊之缺不必派署
等情亦非所宜另摺所陳新疆軍務不辦卽止無中立之理此言
實是又謂今日之事宜盡撤烏科防兵速裁伊塔見存各官畱索

倫兵於俄國給厄魯特游牧地等情此中窒礙甚多新疆各城

列聖艱難締造具有深心原以屏蔽內地今欲舉烏科等城一概

不守北而張家等口西而秦隴皆成國家要塞大局所關李雲麟

能保其必無後患乎索倫本屬勁旅烏科兩城防兵既屬無多蒙

兵又不足恃自應設法調回以壯兵力或擇地辦理屯田以資養

贍卽爲將來西征之先驅庶有實際仍著榮全妥籌辦理棍噶札

勒參之爲人李雲麟既知其攬權難馭而又欲以厄魯特之眾全

數給該喇嘛爲門徒亦涉自相矛盾此項人眾應如何安插俾遂

驅策之處著再與麟興妥爲辦理伊塔所存各官著榮全等量爲

裁撤以節糜費刻下哈密已復巴里坤可以固守李雲麟等惟當

力保烏科等城聯絡棍噶札勒參以壯聲勢待肅州克復大兵出

關自可徐圖恢復著德勒克多爾濟錦丕勒多爾濟麟興榮全奎

昌明瑤與李雲麟商酌就見有兵力餽力妥爲守禦如德勒克多爾濟等各有所見不妨單銜具奏以備採擇將此由六百里各諭令知之○予陝西陣亡副將胡理明等祭葬世職○癸卯諭軍機大臣等劉嶽昭奏言軍肅清黔大並剿辦豬拱箐苗匪大勝見擬進剿平遠各摺片黃號及苗教各匪肆擾黔西大定爲患已久豬拱箐苗匪嘯聚日眾爲三省邊防巨患該撫及藩司岑毓英分路攻剿將黃號並苗教大股匪徒殄滅首逆擒戮殆盡豬拱箐賊營百餘座亦爲滇軍平毀岑毓英所紮行營已距山頂不遠辦理奮勉甚屬可嘉著劉嶽昭卽飭該藩司乘此聲威將山頂賊巢攻拔肅清匪股以竟全功平遠所屬之牛場苗匪卽著劉嶽昭相機進剿迅速殄除以絕豬拱箐外援知州蕭培基於牛場苗匪肆擾並不集練攻剿又於鄒復勝進兵時以無糧力阻實屬意存苟安著

劉嶽昭張亮基查參黔西大定一帶並著張亮基揀派得力文武
彈壓鎮撫毋得專恃客兵將此由五百里各諭令知之○命詹事
府詹事廣壽在弘德殿行走○甲辰李鴻章奏任賴捻股自四月
初五日銘盛等軍在信陽境內攔剿敗遁入鄂是日卽由應山縣
城東北竄過適總兵王永勝等營趕至初六日出隊小有擒斬賊
卽竄孝感之小河溪劉秉璋與楊鼎勳將出鄂境仍由廣水驛折
回李昭慶由德安前往會師劉銘傳亦督隊繼進先後均過小河
初七八等日賊東竄黃陂之兩河口各軍分路趕追計西路兵力
已厚該逆不至回竄德隨勢將由麻城黃安北趨豫之光羅否則
由蘄州廣濟等處東窺皖之宿太臣已嚴飭淮軍諸將會同鄂軍
儘力兜擊豫省宋慶一軍見駐信羅自可相機扼截皖西空虛並
函商撫臣英翰趕派扼堵中原麥熟難保不閒道出竄臣軍俱調

往鄂境有追剿之兵更無迎堵之兵南北數千里久旱不雨農田
枯槁民情惶惑於剿賊大局尤有關繫惴慮實深又奏據劉松山
李祥和稟稱三月十五日攻克臨平鎮後捻逆句合同匪悉向武
功東竄劉松山等會同黃鼎安住等軍折赴興平截剿十七日抵
張楊村馬賊突至各軍督隊猛擊殲斃百餘人賊竄咸陽一帶十
八日各營疾馳八十餘里至涇陽之竹范村擒斬三百餘名十九
日該逆至彭王村一帶圖竄涇河我軍於二十日五鼓先由臨涇
渡河以待該逆果由花池渡宋村渡等處竄越劉松山等分三路
進剿縱橫衝殺賊遂大潰敗賊向三原富平遁走殺斃淹斃生擒
共計約二千人二十四日我軍追抵富平時賊踞城東王寮鎮一
帶會同郭寶昌進擊賊由北原下竄流曲鎮二十五六等日我軍
紮原邊東西各堡仍分三路進攻斃賊甚夥二十七日各軍進逼

流曲鎮賊出隊死拒各勇愈擊愈奮奪回村堡數十處賊由蘇坊村向蒲城竄大荔屬之洛河東岸我軍由蘇坊跟追四月初一日至晉成堡拒河十里賊過河迎拒揮隊擊之敗回東岸淹斃甚眾初二日追至距同州十三里之姜彥村劉松山揮隊奮擊賊竄同州東北初三日劉松山等探知賊屯許莊小壕各村卽率部分進猛攻賊棄巢遁去我軍整隊欲追忽見前面馬賊橫互二十餘里作長圍包來步賊結數十團分道進逼劉松山李祥和與黃鼎各率隊奮擊盪決無前斃老賊數百賊大敗狂奔餘逆紛竄謝家坡等處各軍暫紮許莊村擬在同州購糧跟蹤再進是役其計殺傷燒斃生擒者約三千人擒獲頭目鄧立志等訊明正法查張總愚自入秦後大肆鴟張去冬省城岌岌可危曾國藩調派湘軍於臘杪疾走入關每戰必勝數月以來會同安住黃鼎郭寶昌等軍轉

戰涇渭之間賊勢張而復蹙惟該逆既竄同州東北逼近晉防據山西臬司陳湜來稟已商請駐防閩鄉豫軍馬德昭帶八成隊就近過河移紮老河口而自守禹門以上並謂見在河水漸漲提盡船隻當可不使竄渡臣已批令劉松山等迅速進兵如賊循邵陽韓城北趨卽靠黃河西岸節節兜剿遮護晉防如賊由朝邑渡渭回豫卽緊追出關回顧陝洛並屬與陳湜互爲策應勿使賊得逞志上諭軍機大臣等任賴捻股由應山東北竄孝感之小河谿旋竄黃陂之兩河口見經劉秉璋等軍分路跟追卽著李鴻章檄飭各軍合力兜剿迅殄逆氛西路兵力已厚該逆既不至回擾德隨竄皖竄豫均在意中宋慶一軍見駐信羅著李鶴年飭令該營相機扼截並著英翰於皖西一帶抽撥勁旅實力嚴防中原麥熟該逆四出掠食是其慣技李鴻章各軍雖俱赴鄂深慮有追剿之

兵而無迎堵之師仍著該大臣統籌全局於無可抽調之中設法
布置妥爲兼顧據稱南北數千里久旱不雨農田枯槁等語寶深
廑繫見在直隸一帶亦屬少雨深恐青黃不接有礙民食該大臣
務當妥籌鎮撫安慰人心庶於軍務有裨將此由五百里各諭令
知之○予陝甘陣亡遊擊胡長才祭葬世職○丙午 上詣 大
高殿祈雨○諭軍機大臣等前因哈密收復無人鎮撫疊經諭令
文麟景廉迅赴新任以重職守並催成祿迅復肅州以便統領大
兵出關茲據伊勒屯奏稱查明伯錫爾被害情形地方大事見無
大員統轄等語哈密甫經收復撫綏彈壓在在均關緊要該大臣
等任意逗畱延不出關殊屬不知緩急且難保非有心規避著文
麟景廉懷遵疊次諭旨趕緊出關馳抵任所將應辦事宜極力整
頓毋再遲延成祿被肅州賊匪牽掣竟無出關信息尤屬疲玩著

卽振刷精神激勵士卒迅將肅城攻拔以便振旅出關毋得再行
遷延致干重咎伊勒屯見任領隊大臣文麟等未到之前務當盡
心防守以固疆圉將此由六百里各諭令知之○廣貴州鄉試中
額一名江西饒州府學額二名德興縣十名湖北麻城七名直隸
赤峰二名廣東三水一名○贈哈密殉難扎薩克郡王伯錫爾親
王建立專祠伯克夏斯林等附祀○丁未諭軍機大臣等譚廷襄
曾國荃奏擒逆東趨安陂仍折回應城官軍疊獲勝仗並會商布
置情形一招擒逆自東竄後經官軍追躡仍復回竄應城雖屢有
擒斬而逆猷未衰前據李鴻章奏稱西路兵力已厚諒該逆不能
逞志卽著李鴻章譚廷襄曾國荃督飭淮軍鄂軍會合追剿並令
宋國永折回洋梓鎮以扼西路要衝該逆在鄂不能得志必思竄
豫著李鶴年飭令宋慶等軍迎頭兜剿以杜紛竄安徽相距雖遠

而該逆飄忽異常不可稍形鬆懈並著英翰嚴飭各軍整旅以待
擒逆狡猾善走非四面圍裹漸逼漸緊斷難杜其奔突李鴻章久
歷戎行卽著廣設方略以殄逆氛河南一帶旣少雨澤而鄂省又
苦久旱所關非細惟有誠心修省冀迓和甘一俟得雨卽著奏聞
鮑超戰功卓著實爲國家干城之選見聞病勢沉重深爲廬繫著
曾國荃就近傳諭令其慎重醫治安心養息以冀速痊將此由六
百里各諭令知之○諭前有旨令劉嶽昭由溫水進剿黔西大定
俟肅清後移師剿辦豬拱箐毋庸分兵遵義茲據張亮基奏請仍
飭劉嶽昭暫駐貴陽剿辦附省各匪等語黔省龍貴壩芒尙大坪
各股逆匪逼近省垣兇熾甚熾省城情形益困若再無兵剿辦勢
將不可復問自係實在情形惟劉嶽昭已將黔西大定一帶肅清
豬拱箐苗匪亦經岑毓英進攻連獲大捷苗匪老巢指日可拔劉

嶽昭一軍似未便移就貴陽致失機會且滇省見無大吏彈壓張
凱嵩到滇尙需時日劉嶽昭自應迅籌赴任或先能肅清貴陽附
近一帶再行統兵赴滇著劉嶽昭斟酌辦理黔省餉匱兵單實深
廩繫賂秉章於張亮基所請協黔餉需總應不分畛域力爲籌濟
諒不至固執成見任聽黔省呼籲漠不關心著卽竭力措解以拯
貴陽大局毋許再事推延致負委任張亮基原片一件著鈔給賂
秉章劉嶽昭閱看將此由六百里各諭令知之○予貴州傷亡遊
擊張定固廣西陣亡參將胡益志等祭葬世職○戊申諭軍機大
臣等左宗棠奏隨州追賊出境行抵樊城雇備車馱剋期入關一
摺鄂省軍情前據李鴻章曾國荃等各奏情形與左宗棠大略相
同著李鴻章曾國荃懷遵疊次諭旨廣籌方略迅殄逆氛昨據曾
國荃奏陳鮑超病狀甚爲廩繫該提督患病以來所部各軍暫派

宋國永統帶疊經有旨催令夾擊何以至今未聞宋國永等與賊接仗若早能移軍駐扼洋梓雙河何至蹤賊亂竄著李鴻章曾國荃傳諭鮑超速令宋國永等扼紮要隘聽候調度奮力剿賊如再貽誤必將宋國永等從重治罪鮑超亦不能辭咎也前據庫克吉泰等奏劉松山等軍節次獲勝賊勢已窮當諭該將軍等督飭各軍乘勝殄除並防竄晉左宗棠節制晉省呼應始靈著隨時偵察賊蹤會同趙長齡等加意防範相機掃蕩所陳取道情形朝廷不爲遙制將此由六百里諭知李鴻章左宗棠曾國荃趙長齡並傳諭鮑超知之○諭前因左宗棠奏陝甘需餉孔殷請於上海洋商借銀一百二十萬兩由各關稅項下撥還當經諭令曾國藩等督飭各海關監督按數出給印票遵照辦理茲據左宗棠奏此次行糧僅止五萬餘兩入關後軍餉專恃洋商借款暫資接濟見閩山

西運城商銀尙多可供匯兌請飭應協各省速發印票交上海轉
運局道員胡光墉領取交洋商兌取見銀付與票商即可換取票
商銀票至運城收兌等語左宗棠見在整隊西進不能停兵待餉
自應照該大臣所請迅集鉅款以利師行著曾國藩英桂吳棠瑞
麟譚廷襄曾國荃馬新貽李福泰蔣益澧郭柏蔭師曾各懷遵前
旨按照左宗棠所定數目交胡光墉領取向洋商兌取見銀付與
票商即換取票商銀票至運城收兌解付該大臣軍營提用所借
銀兩仍著各該省自本年七月起分六箇月於各關稅項下撥還
並於應解甘餉按月撥交各關以清款目將此由五百里諭知曾
國藩英桂吳棠瑞麟譚廷襄曾國荃馬新貽李福泰蔣益澧郭柏
蔭並傳諭師曾知之○庚戌諭軍機大臣等劉長佑奏遵飭提督
啟程並派員接署提篆一摺署直隸提督婁雲慶雖暫練新軍而

霆軍乏人統帶尤關緊要劉長佑已飭令交卸啟程卽著催令乘坐輪船赴江甯聽候曾國藩差委儻鮑超病體就痊婁雲慶可以不必接統霆軍並著曾國藩察看情形仍飭回任以資督練直隸提督員缺緊要劉長佑見派鄭魁士署理該提督久歷戎行自能熟習營務而意氣漸平當知力顧大局和衷共濟不至復蹈故轍所有古北口練軍准其派鄭魁士接辦但所挑選兵丁務當以精壯爲先不可稍存私見致有偏重著劉長佑傳知該提督懍遵此意用副委任將此由六百里各諭令知之○諭楊岳斌奏貴德廳回匪叛亂情形一摺本年二月間貴德廳回民突起叛亂將同知承順及家屬殺害踞守廳城覽奏實堪痛恨西甯回民就撫本不足深恃玉通主撫而毫無防範以致匪黨益無忌憚此次貴德旣爲賊踞勢難再事羈縻著楊岳斌卽飭提督鄧全忠等督帶所部

勇丁聯絡該處鄉團設法進剿迅將貴德廳城攻拔毋任久踞玉
通亦當督率兵團嚴密防守毋再輕信奸回詭詞致爲所誤所有
死事員弁著楊岳斌查明請卹千總七生春潛逃出城著先行革
職交楊岳斌查辦其餘聽賊指使捏詞稟報之文武員弁著一併
查明參辦另片奏甘省餉糧軍火萬分缺乏請飭速解等語甘省
困乏情形實深焦灼陝甘唇齒相依豈容坐視著喬松年督飭林
壽圖將陝臺見存餉銀軍火帳房等項迅速派員探明路徑繞道
解甘並著譚廷襄會國荃督催湖北後路糧臺將餉銀軍火源源
運至漢中分局轉解赴甘以濟眉急原片著鈔給譚廷襄會國荃
喬松年閱看將此由六百里諭知譚廷襄楊岳斌會國荃喬松年
玉通並傳諭林壽圖知之○辛亥李鴻章奏捻逆自信陽回竄鄂
境劉秉璋等軍分路緊追四月初五六等日總兵董鳳高等探悉

賊在應山督軍進剿疊有擒斬初七日該逆自小河奔竄黃安之
河口鎮劉秉璋與楊鼎勳追抵小河李昭慶由德安趕到飛調王
永勝董鳳高赴花園改由南路兜剿初九日劉秉璋等馳抵黃家
橋賊已整隊迎敵各營進擊該逆越山而逃是晚有賊酋胡連發
帶二十餘騎乞降初十日我軍進至長山寨賊馬步分股拒戰自
辰至午相持數時各營一擁齊進賊陣潰亂擒斬甚多賊均退踞
河口是夜遁去十一日我軍拔隊緊追楊鼎勳帶所部八營先行
已刻至王家田忽山內伏賊馬步七八千人覬我軍頭隊已過突
出邀截楊鼎勳當飭各營結爲方陣短兵相接弁兵頗有傷亡劉
秉璋在後趕派吳長慶況文榜率八營往援兩軍苦戰將賊擊退
向宋埠竄去劉銘傳一軍於十二日馳抵黃安紫屏鋪正值大股
賊匪東竄官軍分三路迎擊賴任牛各逆亦分隊來撲鏖戰逾時

賊始大敗越嶺狂奔我軍分路緊追擒殺數千奪獲騾馬千餘匹沿途解散難民萬餘人追至陡山收隊李昭慶正帶隊進分水嶺忽見大股之賊自東回竄行走甚疾李昭慶督馬步各隊迎擊王永勝等直衝賊陣各營并力齊進斃賊數百名賊眾奪路向西逃竄生獲賊酋潘石頭蔡大義等供稱逆首畏兵追逼仍回安陸舊口一帶臣查任賴等逆在鄂中屢勝之後勢甚猖獗此次由黃安東趨欲由黃州廣濟下竄皖豫經各軍分路追擊劉銘傳攔頭痛勦始折而西准曾國荃函稱賊於十四五等日過雲夢應城已趨舊口天門等處見催宋國永等帶霆軍由隨州折赴安陸之洋梓扼柴要隘鄂軍回紮早市天門劉銘傳督軍已赴京山如霆軍能扼安陸竄路即可設法就地兜圍臣飛飭劉秉璋李昭慶等酌量回軍以助聲勢此次尤爲出力之降補參將董大義等先行開列

額懇恩施其餘出力員弁容臣查明彙請獎勵陣亡之總兵張遵道等均請旨飭部從優議卹以慰忠魂上諭內閣捻逆自信陽向竄湖北境內劉秉璋等軍連擊於應山黃安等處疊有斬擒劉銘傳一軍馳抵黃安榮屏鋪分三路迎擊該逆大敗狂奔追殺數千名復經李昭慶等軍截剿於分水嶺等處賊遂向西逃竄剿辦尙屬得力仍著李鴻章督飭各軍乘勝進剿迅殄賊氛○予湖北陣亡總兵官張遵道等祭葬世職○是月緩徵浙江臨安等七縣被擾額賦

東華續錄

同治六十四

臣王先謙敬編

臣張式恭恭校

五月癸丑朔子湖南陣亡參將楊友春等祭葬世職○甲寅諭軍機大臣等成祿奏哈逆東竄旋退並副將凌祥失利情形各摺片哈密回匪由安西東竄玉門冀援肅州經成祿派令寶型迎擊多設疑兵賊眾旋即驚退惟該逆雖經暫遁難保不去而復來仍當勤探嚴防不得稍形鬆懈並督兵迅拔肅城速爲出關之計毋再稽遲干咎已革副將凌祥前在哈密接仗失利本應治罪見據成祿查明該革員於接仗時身受矛傷著從寬暫畱軍營責令出關效力自贖將此由五百里諭令知之○以旱命各省恤難民育嬰孩揜暴露贍陣亡兵勇家屬○丙辰諭內閣前因御史佛爾國春

奏湖北竹木商捐一款會國荃前於過境時曾用銀三千兩及歷任巡撫到任辦理鋪陳修理衙署皆於此款領用各節當諭令譚廷襄查訊茲據譚廷襄奏稱前於查辦官文被參案內業將調到清摺覈明並無會國荃用銀之款復訊據委員孫振銓供稱同治三年會國荃過境曾由糧臺解過舊欠餉銀四萬二千餘兩係屬正款並未支竹木商捐歷任巡撫到任該員並未辦過支送鋪陳等項又據總局司道詳稱歷年在竹木商捐項下領過辦公等項銀錢如兵差隄工城工修理衙署皆確有案據並送鋪陳規費各等語此案會國荃被參動用竹木商捐等款既無其事著毋庸議至佛爾國春原奏內所稱會國荃原參官文賄通肅順貪婪欺罔各節據綿森等查屬子虛會國荃宜照律反坐一節官文受文宗顯皇帝特達之知十數年歷著勳績詎不至孤恩昧良肆行貪

罔且其重鴈疆寄尙在肅順未經用事之先亦無所用其黃綠朕御極之初曾特諭內外臣工既往不咎曾國荃以影響之事臚列入奏本屬不諳大體佛爾國春遽行加以反坐之罪尤屬迹近報復故爲苛論嗣後風聞言事必宜慎重黨援攻訐之風斷不可開所奏並毋庸議○諭軍機大臣等何瑄奏哈密見在情形並請撥倉糧各摺片何瑄見派孔才等所部分駐瞭墩等處其餘兵勇駐紮哈城哈密境內漸次肅清卽著該總兵會商伊勒屯等妥籌鎮撫一面仍將鼠匪相機進剿迅殄逆氛巴里坤哈密兩城米糧萬分缺乏又兼本年荒旱難望收成兵勇枵腹堪虞亟應速籌接濟何瑄前經奏請於墩煌縣指撥倉糧一萬五千石著穆圖善楊岳斌嚴飭該縣趕緊採辦運解巴城以濟眉急成祿著懷遵疊次諭旨迅將肅城攻拔振旅出關毋再遷延干咎將此由六百里諭知

穆圖善楊岳斌成祿並傳諭何珣知之○署湖廣總督譚廷襄等奏擒匪由棗陽趨豫見籌布置防守得旨劉銘傳等軍獲勝情形前據李鶴年奏到與此奏大略相同見在賊眾竄過棗陽勢將入豫著譚廷襄曾國荃飛咨豫省嚴防並派兵出境進剿不得稍分畛域仍防回竄黃麻等處毋稍懈怠○丁巳李鴻章奏擒逆於四月十四日竄至孝感劉銘傳督軍疾追十五日追抵雲夢乘夜進擊賊不及防自相驚潰斃賊數十名生擒賊目陳大潰一名該逆不敢喘息向阜市一路奔竄十七至十九等日忽折向京山由郢東洋梓上竄霆軍宋國永等由隨州回軍西向十九日抵棗陽之吳家店適賊由宋家集竄至平林店圍山一帶距該軍約二三十里不等二十日商令提督唐仁廉率隊夜襲圍山賊館斬擒悍賊數百名二十三日該逆竄至新野東南之朱集水台並南陽西南

之清華穰東等處邊馬擾及鎮鄧境內據獲賊供稱該逆因追兵
緊逼欲竄東豫又欲逃往陝西等語查該逆疊經挫敗窮數日之
力奔突出鄂其圖竄東豫蓄志已久惟豫境平曠四達賊情剽竄
無常目下既至宛郡或東走葉裕或西趨內淝以圖入陝尙未可
定劉銘傳由棗陽緊追出鄂周盛波由信陽馳赴泌陽已檄令該
兩軍視賊所向相機兜剿豫軍宋慶亦率隊馳往新唐均與霆軍
前後聯絡東豫徐亳新麥登場計旬日內可收入寨民食稍易保
護如賊果東趨當令潘鼎新劉士奇兩軍會合迎截爲東路援剿
之師其餘援鄂諸軍馳逐數月疲乏已甚檄令分道回豫更番休
息察度賊蹤再行進戰 上諭軍機大臣等刻下逆蹤尙無定向
陝豫俱應嚴防著李鴻章督飭劉銘傳周盛波等軍相機兜剿李
鶴年令宋慶迅赴新唐會合霆軍夾擊新練之軍如可抽調著飭

張曜擇要扼擊爲一鼓聚殲之計如賊果東趨李鶴年飭潘鼎新等迎截丁寶楨卽派兵迎堵並著左宗棠喬松年趕緊調派勁兵遏其入陝之路該督撫等務須不分畛域督軍會剿迅殄賊氛以慰廑念將此由六百里各諭令知之○戊午諭內閣瑞麟等奏勦辦曹冲客匪屢獲大勝該匪勢窮就撫並籌辦善後情形一摺廣東曹冲客匪負隅抗拒經蔣益澧督軍進剿屯兵於獅子山等處分路攻擊屢獲勝仗追至田頭賊寨乘勢環攻赤溪股匪分路來援該撫揮軍迎剿仗兵四路包鈔賊匪前後受敵旋即敗退三月二十五日官軍直逼田頭環築礮臺晝夜轟擊四月初二日分兵駐紮牛屎巷以扼曹冲赤溪要道兩寨悍賊同時來撲兵勇用礮轟擊斃賊無算賊始敗退收隊後該逆冒雨圍攻沈玉遂營盤拔抽木椿愈撲愈悍蔣益澧挑選敢死之士由營後突出追殺該匪

驚潰狂奔次日出隊將曹沖赤溪之匪截斷開放大礮炸礮悉落寨中賊始膽落技窮赴營求撫定期呈繳軍械將寨柵一律平毀放出被擄子女縛獻抗官悍黨地方肅清蔣益澧親督將士將積年客匪剋期蕩定深堪嘉尚著交部議敘所有應辦善後事宜卽著照該督撫所議次第興辦另片奏請照恩平客籍成案准其考試每二十名取進一名等語該客民等旣經改過自新卽係朝廷赤子自應加恩拔取秀良以廣培植餘均照所請辦理○諭軍機大臣等張之萬奏阜甯海匪聚眾劫掠請飭調輪船出洋夾擊一摺阜甯地處海濱毗連直東洋面匪首沈如鈞卽沈如懋膽敢聚眾搶劫雖經張之萬派兵折毀其巢而該匪駛至外洋欲結幅匪滋擾其計甚爲狡惡不可不亟行捕剿以靖洋面張之萬雇募商船出洋追剿恐未能力上海向有輪船及捕盜局綠皮艇師原

以備捕剿海盜之用卽著曾國藩郭柏蔭迅速調派出洋奮力追剿務將首匪弋獲不使一名漏網其江北沿海各隘口並著張之萬派兵嚴密堵截毋令登岸儻有接濟匪糧者著各嚴行查禁以期迅速蕝事免滋後患將此由五百里各諭令知之○諭瑞麟蔣益澧奏曹冲客匪畏罪投誠辦理善後情形請將出力文武獎勵各摺片曹冲等處客匪恃險抗拒負嵎日久經蔣益澧親督官兵節節進紮屢敗賊眾並分兵斷其接濟匪黨窮蹙畏罪真心乞撫見在辦理善後已有頭緒該撫躬歷險阻奮勇督戰剿撫兼施將十餘年巨寇迅速蕩平深堪嘉尙本日已明降諭旨將該撫交部議敘並將出力各員弁照請獎勵所請將梅啟照以鹽運使記名與定章不符已交軍機處另行存記矣粵東土客械鬭積釁多年勢難令其同居錯處瑞麟等兒擬將曹冲等處以內田廬撥歸客

民冲襲等處田畝撥給被逐土民俾其各分疆界畫地而居永絕葛藤並設官駐兵編籍鄉試所籌均屬周妥卽著將詳細章程妥議具奏其入學考取定額亦於本日明降諭旨內照請允行矣將此由五百里各諭令知之尋奏土客所爭首在田產曹冲以內共田三百餘頃足資生活又設遵義書院以振士氣復飭新甯縣知縣饒繼惠設立清查撫恤局招集流亡散給籽種另委知府李國賢等帶撫標營兵八百名駐紮浮石以資撫恤得旨辦理甚爲周妥仍著該督撫慎選牧令隨時畱心駕馭並將清查撫恤事宜認真籌辦以期土客各民日久相安毋稍疏忽○諭各省廣購書籍並重刊 列聖御纂欽定經史頒發各學○諭禮部增修學政全書○江蘇阜甯縣海盜滋事命曾國藩等調師船追擊並嚴斷接濟○追予故河南河道總督潘錫恩諡文愼命國史館立傳○已

未 上詣 大高殿祈雨○諭軍機大臣等庫克吉泰等奏官軍
剿賊疊勝擒股東竄追擊情形一摺郭寶昌一軍在朝邑等處力
戰三次獲勝殲斃髮逆千餘名復將渭濱悍賊悉數剿除與劉松
山等軍併力攻克普集鎮等處追至省城南門外奮力鏖戰德興
阿等亦督兵出城助擊追至灞橋此次各軍奮勇爭先將竄撲省
城之賊力斬數千精悍匪黨大半授首解散裹脅萬餘人兇餓已
衰剿辦極爲得手著該將軍等督飭諸軍乘勝窮追務將此股速
行殄除毋任滋蔓左宗棠計已抵關著卽與陝省追軍合力攻擊
將此股就地殄盡毋令竄入豫鄂喬松年奏覆辦理撫回情形一
摺頗爲有見著左宗棠到陝後妥商籌辦原摺著鈔給左宗棠閱
看將此由六百里各諭令知之○諭榮全奏起運軍餉被俄官阻
滯並索倫人口逃入俄界一摺喀帕兒所借餉銀俄官庫必那圖

爾雖阻止前進亦係慎重之見此時是否解到抑應扣留起解均
著榮全酌量辦理續行逃出索倫男婦尙有千餘名之多在俄境
逗留聞之深爲軫念索倫勁旅從前效力最多豈可令其流離失
所著榮全於赴俄國商辦事宜時將前此逃出及此次續行逃赴
俄國之索倫男婦厚給川資設法護送至烏科兩城妥爲撫恤斷
不可吝惜小費致令再受困苦此事朝廷夙夜在念若不趁此積
雪融化之時趕緊接出則此後更難行走諒榮全定能仰體辦理
也另片奏請將訥勤圖等獎勵等語前鋒訥勤圖烏仁泰由斜米
赴烏垣正值嚴寒之際不辭辛苦跋涉越嶺甚堪嘉尙訥勤圖烏
仁泰均著賞加六品頂帶以昭激勸將此由六百里諭令知之○
以勦賊奮勉陝西軍營已革總兵官郭寶昌遣戍○辛酉諭軍
機大臣等李鶴年奏任賴股匪由新野北竄官軍追擊獲勝張逆

擾至盤鄆將由臨渭回竄豫省並探賊蹤已至襄許各摺片任賴等逆由新鄧北竄襄葉許州已見賊蹤李鶴年見駐許境著就見有兵力並張曜新練之軍擇其可用者嚴加防範不可稍有挫失致損軍威尤須防其竄撲省城之路省城防務著督同卞寶第李宗燾等妥爲籌辦仍飭宋慶馬德昭等軍繞前截擊毋任蔓延李鴻章見在周口著督飭湘淮各軍前截後追力求制勝之法並著英翰督兵出境防剿毋分畛域以免闖入皖境蘭考等處爲該逆竄擾熟徑恐一撲犯則直東河防均形喫緊著劉長佑督飭張樹聲趕緊赴防認真籌辦丁寶楨已至防所著卽擇要駐紮毋任一賊偷渡張逆由盤鄆竄臨渭左宗棠帶兵由潼關入秦正在迎頭截剿並著喬松年督同劉松山郭寶昌等軍追擊先滅此股毋任竄出與任賴等股復合致辦理又形棘手將此由六百里各諭令

知之○張凱嵩疏薦廣西在籍主事鄭獻甫教授陳鑑等孝友學
行詔獎敘有差○命曾國藩爲大學士仍畱兩江總督任以駱秉
章協辦大學士仍畱四川總督任○癸亥諭軍機大臣等兆琛奏
官軍各路獲勝並布置楚防情形一摺兆琛一軍自踏平寨頭附
近各寨後將清江援賊及另股攻圍馬鬣嶺民垵苗逆分路擊退
並將燕溝洞等處賊壘攻克其撲犯長吉等處賊匪復疊被官軍
擊敗李元度一軍亦進逼荆竹園老巢屢挫賊鋒並攻克招降河
西各寨周洪印一軍將竄擾靖城附近地方苗匪擊敗分扼邊隘
辦理均尙得手著兆琛督飭諸軍分路防剿並令李元度先將河
西肅清以便併力攻拔荆竹園老巢疏通黔省東路張亮基亦當
派兵由上游而下與楚軍會合夾擊以期迅掃妖氛並著劉崑將
沅晃靖一帶要隘嚴防以固楚省腹地仍遵奉前旨飭令席寶田

速募楚勇成軍前往黔疆接替兆琛將此由五百里諭知劉崐張亮基並傳諭兆琛知之○予貴州陣亡參將王華廷被戕知州何琳等祭葬世職○乙丑諭軍機大臣等富明阿等奏遵旨安插乞金流民藐法不逞之徒派兵夾擊改設守山卡倫各一摺葦沙河金夫其安分畏法者經協領那斯洪阿等親率該佃民均赴木齊河樺樹林子一帶安插撥給地二千三百餘晌所撥之地過三年後另行追繳游民私墾盜種地三千九百餘晌一併歸入節年開荒案內報部作正支銷均著照所請行富明阿等於此項各事宜務當實心經理毋得有名無實致令別滋事端其甯古塔琿春謀逆之匪見在零星散匿並著富明阿等檄飭派出官兵嚴密搜捕務絕根株此次那斯洪阿等隨帶之筆帖式等准其於彙保案內擇尤請獎毋許冒濫該將軍等以今昔形勢不同擬將守山卡倫

擇要改設卽著照所議妥爲辦理圖畱覽將此各諭令知之○李鴻章奏據探四月二十五六七等日捻逆由宛郡西竄鄧州鎮平內鄉各境有由浙川荆子關入陝之勢適豫軍宋慶由南陽進擊淮軍劉銘傳由棗陽襄陽緊躡其後二十八日馳抵鄧州二十九日該逆聞風逃遁副都統善慶等督隊追至白龍廟任逆分路回撲均經我軍擊敗擒斬賊目多名追至鎮平縣之馬莊賊向東南竄去五月初一日竄至唐縣裕州之交經周盛波等截擊遂折而北趨橫竄舞陽葉縣臨潁等處初四日過許州西北李鶴年派張曜出隊攔擊初五六等日竄洧川尉氏中牟一帶山東藩司潘鼎新在尉氏之張市出隊攔剿該逆又折而北初七日潘鼎新拔隊跟追據擒獲賊供賴李兩逆本圖竄陝任逆由鄆城梁山寨有土匪勾引欲赴東裝旗等語豫境平原四達無險可扼該逆避兵急

趨日夜東走其爲竄東無疑劉銘傳前在信陽整練兩目銳氣甫復尙能與賊馳追東自應山黃陂西出安陸襄棗頃又由南陽追至鄭州等處日行百里該逆雖望風奔逃而軍士亦冒暑疲乏臣令其馳抵曹單暫行屯紮察度賊情地勢再圖合力兜圍賊過蘭考徑趨曹濟圖撲運河本係歷年慣技臣先派有總兵徐道奎水師一營駐防濟甯以下之南陽湖見在因日久不雨河水枯涸南陽湖至谷亭十八里人馬暢行礮船無可施展賊若由北徑犯鄒滕則運防大局隳於一旦實爲可慮臣飭潘鼎新如賊入東卽緊蹙前往與運防水陸各營妥籌策應又徐州防兵甚爲單薄江境運河亦涸恐賊乘虛下竄已飛咨兩江督臣曾國藩商令長江水師提督黃翼升迅率礮船馳赴清江徐州一帶會督水陸各軍嚴密巡防又派總兵沈宏富帶領馬步八營由周家口拔赴歸德相

機截堵如賊已東竄卽由虞城赴豐縣扼剿與劉銘傳等軍聯絡
臣當隨後馳往督辦 上諭賊由鄧州唐泌等處奔竄劉銘傳周
盛波等追擊各獲勝仗該逆逼近許州復經李鶴年派張曜出隊
攔擊見由洧川尉氏竄中牟一帶據擒獲賊供賴李兩逆本圖竄
陝因鄆城梁山寨有土匪勾引欲速赴東裝旗李鴻章見令劉銘
傳一軍屯紮曹單察度合圍刻下河水乾涸礮船無所施展著李
鴻章督飭潘鼎新緊躡賊蹤與運防水陸各營妥籌策應丁寶楨
諒已到防著卽將鄒滕等處速籌布置鄆城土匪著派兵先事查
拏以免勾結爲患江境運河亦涸恐賊乘虛下竄著曾國藩令黃
翼升迅率礮船馳赴清江徐州一帶會督水陸各軍嚴密巡防以
期有備無患李鴻章仍當催令沈宏富劉秉璋等相機進發力圖
制勝該大臣應赴何路調度卽行酌度移營不爲遙制賊蹤見在

中鄭其地濱臨黃河逼近省會李鶴年已令朱慶恩勒令張曜由洧尉一路繞出賊前悉力扼截均尙妥協著卽督飭諸軍認真遏截痛挫兇鋒省城防務著督飭藩臬兩司妥爲經理不可稍涉大意開東去賊不遠著劉長佑催令張樹聲趕緊赴大名一帶督辦防務該督撫等均須振刷精神力籌堵禦之方儻任滋擾完善惟該督撫等是問將此由六百里各諭令知之○丙寅以旱詔清理庶獄○龐鍾璐奏陳荒政十條命萬青藜等妥籌以聞○丁卯諭軍機大臣等丁寶楨奏捻股竄入東境力籌防剿一摺捻蹤剽疾異常已由考城晝夜潛奔竄至曹州及鄆鉅境內志在搶渡運河圖擾東府見在運河水勢淺狹情形喫重著丁寶楨督飭見有兵勇嚴密扼守隄牆毋任竄越南陽湖水乾涸新店新廬及谷亭一帶防務更爲喫要丁寶楨雖經分調陳錫周等各營分紮仍慮兵

力單薄著李鴻章迅檄劉銘傳潘鼎新等軍星夜兼程馳援東境毋稍延緩防河水勢雖漲防堵不可不密著劉長佑丁寶楨李鶴年各飭水陸文武嚴密巡防不可稍涉大意蘇廷魁亦當督率河標兵弁一體助守毋得置身事外將此由六百里各諭令知之○諭張凱嵩奏慶遠官軍越境攻克苗寨收復荔波縣城一摺此次慶遠官軍擊敗黔苗乘勝進攻荔波收復縣城勦辦尙屬奮勉其尤爲出力將弁著張凱嵩酌保數員以示獎勵毋稍冒濫粵軍遠駐黔境糧運難繼自係實情張亮基責任封圻旣不能派兵會剿迨客軍越境收復又復置之不問疆臣職守之謂何著卽抽調勁旅赴荔夾剿妥籌善後不得以兵單餉絀徒知諉過於人巧爲掩飾吳昌壽計日當可到任並著嚴飭各軍無分畛域總以地方爲重不可稍有推諉該督撫等功罪所在朝廷自能洞鑒也勉之將

此由五百里諭知張凱嵩張亮基並傳諭吳昌壽知之○江西巡撫劉坤一奏拏獲義甯州起事紅蓮教匪首李觀芬等得旨著卽督飭地方文武各官迅速接捕不准一名漏網並著兩湖督撫一體嚴密緝拏務期悉數就擒盡法懲治以絕根株○廣順天鄉試滿洲蒙古中額一名京旗滿洲蒙古學額十名○戊辰諭內閣候補內閣侍讀學士鍾佩賢奏稱夏同善誅幸惇親王府諭旨稱循舊章以折之倭仁諫設同文館諭旨令酌保數人以難之似該員於二事尙未深悉溯查從前詣近支親王府第 神殿前行禮事非一次本有成案可循非剗爲此說以折夏同善也倭仁請罷同文館亦因摺內有天下之大不患無才之語或者該大學士確有所聞故令酌保數員總之臣工有所敷陳必當詳覈事實固不可苟爲容悅亦不可見好沽名爾大小臣工嗣後務精白乃心其

圖匡弼以期君臣交儆感召 天和實有厚望焉○詔求直言並
覈減 宮廷用款○己巳 上詣 大高殿祈雨○諭軍機大臣
等丁寶楨奏賊眾搶撲運河見由汶上進剿並嚴布黃防一摺捻
蹤由豫入東從鄆城梁山閒道直撲沈口官軍鏖戰不支該逆於
戴廟水涸處衝突過河分爲兩股一股屯踞戴廟一股屯踞三里
莊省防喫重丁寶楨已帶王正起等營由汶上一路迎截著卽催
調王成謙等合力追剿力顧省防東昌張秋等處黃防著卽嚴飭
翼易圖等認真防範並飭濱黃各州縣嚴查渡口將船隻盡行提
歸北岸以杜北竄儻有疏失卽以軍法從事丁寶楨於運河防務
未能得力雖因河水旱涸究屬籌策無方著交部嚴加議處總兵
王心安著卽革職暫免治罪仍畱營效力以觀後效儻再不知愧
奮卽行從嚴參辦都司朱萬美於認守地段不能遏賊致壞全局

著卽於軍前正法以昭炯戒其餘陣亡文武員弁著丁寶楨查明具奏李鴻章仍駐周口鞭長莫及著卽移營東境擇要駐紮居中調度劉銘傳潘鼎新等軍均落賊後著該大臣卽行催令迅速赴東力圖剿辦徐州一帶防務著飛咨曾國藩張之萬速調黃翼升到防以資得力宋國永等一時既不能西進著卽酌量檄調並於河南防軍內嚴飭布置以防回竄劉長佑見在已否回省著卽飭令張樹聲專辦大名一帶防務河間景州等處爲直東往來要道著督同唐訓方挑兵赴防毋稍延誤並著崇厚將天津洋槍隊挑選精銳並籌度就近可調之兵聽候諭旨調遣由該侍郎督帶防剿劉長佑崇厚均當多發偵探妥慎籌備毋稍大意將此由六百里加緊各諭令知之○展五城十五廠及普濟堂功德林粥賑兩月○庚午諭軍機大臣等左宗棠奏督軍分道入關一摺劉典唐

協和等軍與鮑超所部在鄂省分路擊賊左宗棠亦親爲策應將賊疊次擊敗偪出鄂境見在逆股業已竄至東境左宗棠正可迅速入關專辦張總愚一股該匪屢爲陝軍痛挫逆燄已衰左宗棠入關後與劉松山等軍會合夾擊務將此股就地殄除不可令其竄入鄂豫又成蔓延不了之局昨據庫克吉泰等奏稱捻匪被官軍在附省一帶擊敗又復渡渭北竄逆騎飄忽異常劉典一軍仍當由荆子關趨赴藍田以防陝捻回竄武關之路毋稍大意另片奏覆陳勦撫回匪事宜與喬松年前奏大略相同回民亦係朝廷赤子斷無盡行誅戮之理惟其中積悍匪徒必先勦盡始可將良回分別招撫尤須另籌曠土妥爲安插毋令與漢民構釁方可久安所稱責令夏回縛獻逆回並令其導引官兵尋蹤勦捕俾漢民稍蠲風忿之處辦理頗合機宜著俟入關時與喬松年妥商籌辦

將此由六百里各諭令知之○諭榮全奏籌畫安插索倫等眾並
棍噶札勒參欲赴俄國一摺索倫蒙古人眾效力最久實爲國家
忠義世僕豈可任其淪落異域前諭該參贊務當設法接出斷不
可吝惜小費見在烏里雅蘇台雖無曠地可以安插或於接出後
令其在科布多暫住再酌量請旨以爲安插之計棍噶札勒參欲
赴俄國所論不爲無見惟蒙古兵丁賴其統帶此時李雲麟既不
前進棍噶札勒參畱爲鎮撫著毋庸前往所有籌辦安插索倫蒙
古等眾事宜著榮全會商妥辦儻經費不敷並著隨時奏聞將此
由六百里諭令知之○烏魯木齊提督成祿奏遵查安玉一帶見
無賊蹤哈密城池經巴里坤兵勇收復該逆已返烏魯木齊故穴
肅州賊勢愈蹙王仁和一軍卽令移紮近城西南聯絡合圍得旨
肅州賊勢旣蹙著與王仁和一軍迅籌攻圍毋得日久淹滯○王

申諭軍機大臣等前據額勒和布等奏游民私墾禁地呈請升科請飭集議並陳與將軍都興阿等籌商兩歧各摺片當派恭親王會同大學士六部九卿議奏並令奕榕會議茲據王大臣等奏稱盛京附近一帶沃壤荒山厯屆未敢輕議開墾而邊荒地闊防檢難周見在所墾地畝僅據何名慶等供稱已有數百萬晌此外尙不知凡幾必須徹底查究庶已墾之地可以覈實清釐未墾之地仍當示以限制請派王大臣前往會同察勘請旨辦理等語著派都興阿延煦額勒和布奕榕恩錫揀派明白曉事熟悉情形之員逐一詳加察勘並著延煦恩錫奕榕進山查勘如果審時度勢不能不俯順輿情所有一切應辦事宜應如何詳定章程俟查勘覆奏到時再降諭旨其有關風水者仍當封禁不得妄議開墾至東界朝鮮地方有無窒礙自當妥籌撫綏俾該國猜疑悉泯著禮部

行文該國告以遽行驅逐恐失業匪民轉致騷擾該國邊境且該國邊境民人亦難保無潛行越界私墾情事令其先行詳查或擬作何安插之處迅速覈覆一面俟延煦等查勘定議後再行酌度辦理都興阿等務當宣示朝廷格外恩施不咎其既往之愆仍予以謀生之路至該省歷任將軍及各部曾經查勘侍郎朝廷寬大之恩既概恕其失察此次查辦各員務須籌畫萬全嚴定章程加意防範以期一勞永逸並^於查吉林五常堡升科成案通盤籌畫朝鮮沿邊情形亦著就近察看具奏何名慶等四人著帶同前往酌度妥辦原摺均著鈔給閱看將此各諭令知之○癸酉夏至地震○諭內閣上年捻逆自豫竄鄂屢經諭令李鴻章曾國荃督飭湘淮各軍及鄂省諸軍實力勦辦以期就地殄滅永靖捻氛乃該逆游弋於鄂之黃麻隨棗豫之南陽信羅一帶縱橫馳逐屢報勝

仗日久無功本年五月間據山東河南各省奏報該逆長驅入豫
歷葉縣襄城許州蘭考直竄山東遂由鄆鉅趨壽張一帶直撲運
河見復竄泰安甯陽等處竄偏省垣尙復成何事體各省疆吏及
統兵大員平日所謂布置防剿者安在殊可痛恨賊至則堵禦無
方賊去以出境爲了事糜帑殃民迄無底止中原捻患何日可平
耶除丁寶楨昨因河牆不守業經交部嚴加議處及認守地段之
營員朱萬美令於軍前正法外湖北巡撫曾國荃著摘去頂帶與
河南巡撫李鶴年一併先行交部議處以示懲儆其防剿不力以
致該逆竄逸各將弁著李鴻章查明參奏李鴻章以欽差大臣督
辦剿捻事宜時逾半載辦理毫無起色殊負朝廷委任著戴罪立
功迅督諸軍馳赴山東會同剿洗務將此股全數撲滅儻再任賊
縱橫毫無調度恐該大臣及該撫等均不能當此重咎也懍之○

諭軍機大臣等劉長佑奏遵飭臬司赴防並籌辦河間景州防務
崇厚奏遵旨挑兵備調丁寶楨奏擒逆渡運東竄分股牽掣經官
軍剿除見在大股竄近省垣督軍扼剿各一摺擒股竄擾汶上甯
陽丁寶楨親督王成謙姚紹修等將賊之分股擊敗擒獲老賊多
名悉行正法大股賊匪由東鄉夏張等處折回泰安見已竄近省
城著丁寶楨親督各軍由肥城長清間道馳赴省城鈔出賊前與
王正起等軍前後夾擊毋稍疏失潘鼎新一軍人數不少前在洧
尉一帶駐紮何以任賊竄過不聞扼截著卽星速馳赴省城實力
剿洗以贖前愆儻再不知愧奮卽著李鴻章丁寶楨據實參奏省
城防務著丁寶楨督飭在省司道妥爲辦理李鴻章見在已否移
營前進該大臣到豫數月布置毫無殊負朝廷期望著卽督率各
軍入東駐紮濟甯一帶妥籌調度賊如到泰安一路可以薄之於

險如趨東三府卽當節節進逼驅至海濱就地殄除儻任渡黃北
犯貽畿輔憂該大臣等自問當得何罪景州河閘防務著劉長佑
督同劉景芳唐訓方認真辦理如能防至張秋齊河更爲完密並
著崇厚將天津所練洋槍隊酌調數百名遴派妥員管帶其春霖
所帶二營在奉省備防本日已諭令都興阿迅飭春霖取道營口
乘船從海道赴津著崇厚卽行催提到津用資調遣如河防無警
崇厚卽暫緩啟程仍隨時與劉長佑籌商辦法務臻周備將此由
六百里諭知李鴻章劉長佑崇厚丁寶楨並傳諭潘鼎新知之○
諭本日據崇厚奏籌辦南防請飭都興阿迅令春霖管帶前項槍
隊弁兵由奉回津等語天津新練四營甫經成軍此外就近營分
實無可調見在奉天地面尙稱平靖自應移緩就急以資調遣所
有備防奉省之通永鎮洋槍隊兵五百餘名及天津鎮五行陣兵

五百餘名著都興阿迅將此項弁兵交署天津鎮總兵春霖管帶
取道營口乘船從海道至天津由崇厚隨時調撥毋稍遷延將此
由五百里諭令知之○諭李雲麟奏遵旨籌辦情形厄魯特毋庸
派員管帶榮全不宜赴棍噶札勒參軍營棍噶札勒參奏請調榮
全赴營並請賞假數月各摺片安置厄魯特遊牧一節既據李雲
麟奏稱勢難稍緩卽著照另摺籌辦情形妥爲辦理至棍噶札勒
參西行後應如何節節布置之處並著悉心經畫計出萬全李雲
麟於所陳各事宜務當實力舉辦毋得徒託空言致貽後患前經
疊降諭旨令榮全籌辦安插索倫蒙古等眾事宜自未能再赴該
喇嘛軍營棍噶札勒參請調榮全會商一切之處暫毋庸議該喇
嘛勇敢素著蒙兵正資統帶豈可再行請假著李雲麟傳知棍噶
札勒參欽遵諭旨奮勉圖功以副委任索倫人眾將來接回後應

否前往巴哈會同防堵之處著李雲麟與榮全屆時會商辦理棍
噶札勒參所稱烏科二城所屬汗王貝勒貝子公札薩克等請特
降諭旨令其幫同防禦奇古竄匪等語著李雲麟傳旨該汗王等
同心守禦以固邊防如該汗王等著有勞績朝廷不難破格施恩
以示鼓勵李雲麟當時加激勸俾切同仇烏科二城布置情形並
著與棍噶札勒參籌商妥辦將此由六百里諭令知之○安徽巡
撫英翰奏捻逆由南陽新鄭一帶東竄派兵出境防剿得旨捻逆
見擾山東甯陽一帶該省防務實未可鬆著卽嚴飭程文炳等軍
相機進紮不准稍有疏虞該撫仍當隨時察看賊情妥籌進止○
河南巡撫李鶴年奏任賴股匪疾竄出境見飭宋慶張曜扼守蘭
考邊境添派精銳抵閔鄉防禦得旨捻蹤尙聚東境該撫務當督
飭宋慶等嚴扼蘭考邊境以杜回竄如各將士防剿不力致該逆

復擾豫疆惟該撫是問其閭鄉一路並著飭令段廣瀛等擇要嚴防毋稍疏懈○予山東陣亡知縣周毓南祭葬世職○乙亥曾國藩奏任賴逆股見已東趨山東防務以運河爲最要本年天氣亢旱運河日涸水師無可展施陸軍尙嫌單薄賊如悉數猛撲恐上年之清河修牆前功盡棄至陝西張逆一股屢經劉松山擊敗逆黨漸衰聞有回竄出關之意如又竄至豫鄂應請旨飭下李鴻章仍檄劉松山追賊東還不宜久畱秦中一則道途太遠糧餉難運一則該軍與捻逆接仗已多深悉賊中伎倆應令各軍全力合謀先保中原腹地李鴻章奏據探捻逆狂竄東境由鄆城梁山東北戴廟突過運河臣憤懣憂惶莫知所措從前僧格林沁督師時運河未經設防捻眾往來自若官軍馬隊甚多尙可隨時馳逐迨曾國藩接辦因湘淮各勇募自南方素無騎隊乃議於運河東岸沿

隄興築長牆嚴堵竄越濟甯以上責令東軍分守臺莊以下責令
清淮各軍分守其濟甯南至臺莊一段向以湘軍水師淮軍陸師
補其闕兩年以來捻逆屢次猛撲未能竄過臣接任剿匪任賴等
股遠竄鄂中臣不得不率全師赴援去冬卽與閩敬銘緘商以東
境運防自黃河以南周家口戴廟至濟甯石佛趙村共不過二百
里有運河可阻有長牆可扼東省財賦較可贍軍應專任本省運
防而騰出前駐濟甯之潘鼎新張桂芳淮軍作爲游擊之師兼顧
他省各督撫自守汛地俾臣得專力援剿庶免處處牽掣閩敬銘
復函頗以爲然卽丁寶楨亦稱濟甯新店以上由東軍認守臣方
慮徐道奎所紮南陽湖一帶水涸易渡不料賊匪直撲鄆北之戴
廟該處東軍水陸兵力尙厚竟不能爲一日之守廢弛貽誤誠可
痛惜臣方檄調劉銘傳潘鼎新周盛波王永勝沈宏富董鳳高各

軍分赴曹單豐徐舊河隄聯絡扼紮並密商豫軍進紮蘭考皖軍進屯蕭楊同時興工圍築冀蹙賊於黃運之間就地勢以圖圍困潘鼎新劉銘傳於五月十二三等日馳抵單縣諸軍未集賊入東南四日而卽撲河未半日而卽搶渡機會頓失局勢大非查賊既過河東而濟泰登萊南而兗沂海贛儘可任意流竄潘鼎新劉銘傳已拔隊過河追剿惟張秋濰口二鎮尤係北竄要津渡口船隻較多該撫當有防備臣深爲懸繫拜摺後卽由周家口啟行先赴歸德察度賊情相機進止一面提催各軍就近調派合無仰懇聖恩飭催直隸督臣於張秋以東黃河北岸迅速擇要嚴防以杜該逆乘虛窺竄又奏臣查劉松山等軍自剿辦西路捻匪於四月初六至二十四等日連獲大勝斃賊三千餘名二十七日各軍由灞橋追至新底鎮詎該逆因潼關有備不敢東竄折沿渭河西趨

五月初一日又敗之鄂縣少義坊小有斬擒遂由盤屋橫出郭公祠竄渡渭北蒲溪鎮桑家莊一帶初三日該軍亦由塔耳寺過河抵張家村賊以大股來撲督勇擊退遁回原處查該逆屢經痛剿奔竄渭河南北窺晉不遂回豫未能賊勢日窮趨向難定已令劉松山會商各軍相機追剿設法殄除勿任該匪得再逞志 上諭軍機大臣等張總愚股匪屢爲劉松山等軍痛剿悍賊死傷甚多又截其東竄出關之路該逆見復渡渭北遁自應乘其衰弱爲就地殲除之計左宗棠見已督軍分兩路入關著卽與陝省兵勇夾擊兜圍迅將此股在陝殄盡免致流入鄂豫儻有餘匪竄出關中卽著庫克吉泰喬松年飭令劉松山跟蹤緊追毋稍鬆勁並著李鴻章一面分派鄂豫諸軍扼要堵擊毋任與任賴等逆合併至任賴等股見已竄至東省搶過運河攻陷隄牆在防將士不能爲一

日之守致誤大局實堪痛恨見在賊蹤已由泰安逼近濟南有東擾登萊青之勢李鴻章當懷遵前諭迅飭劉銘傳潘鼎新等軍速赴濟泰等處與東省各軍合力剿辦毋再延誤張秋齊河等處河防劉長佑丁寶楨均當懷遵前諭嚴密堵禦毋令賊蹤搶渡其齊河以東至利津沿河北岸一帶並著劉長佑崇厚迅速籌撥直軍出境堵扼並著丁寶楨嚴飭武定各屬地方官激勵團練分段助守南岸地方亦當迅籌防堵以固河防鹽河船隻速行提歸北岸以杜賊匪搶渡登萊三面距海賊如竄至自可厚集兵力步步進偪就地殄滅李鴻章見雖移紮歸德著再擇要就近調度毋諉爲賊蹤飄忽漫無籌畫自干罪戾淮徐一帶並著曾國藩嚴密堵扼以防南竄將此由六百里各諭令知之○諭穆圖善奏抵省接印並甘肅軍務地方情形及請飭金順隨營派道員總統諸軍各摺

片甘肅瘠苦情形久縈厯念穆圖善見署督篆務當悉心經理營官既無統領州縣懸缺不補軍務地方何由整頓該署督任楊岳斌久病之後當取其長而矯其失不存成見方能有益前交查辦事件並著持平辦理金順素能辦事著准其調赴省垣所有甯夏將軍篆務卽著豐紳護理豐紳所署副都統並著三壽署理道員蔣凝學久歷戎行素爲楊岳斌所任用穆圖善派令總統諸軍惟才是用必可使屬員悅服見在左宗棠到任需時穆圖善務宜振刷精神竭力整飭以副委任將此由六百里諭令知之○飭山西等省迅解甘肅協餉○予陝西陣亡參將汪明理甘肅知縣多齡等祭葬世職○予故江蘇布政使劉卣膏祭葬卹廕加等○丙子諭軍機大臣等張凱嵩奏鎮安官軍分段攻剿同獲大捷首逆中礮受創見在激勵各軍進剿一摺覃遠璉等軍攻剿鎮安股匪自

二月抵枯馮後屢次獲勝逆首吳亞終親率悍黨來撲官軍奮力夾攻吳逆受傷勢甚窮蹙著張凱嵩督飭覃遠璉等乘勝進逼賊巢力圖攻克盡殲醜類毋畱遺孽吳昌壽早已由浙啟身計可到粵張凱嵩於交卸後卽當挑選精卒取道入滇毋稍延緩將此由五百里諭令知之○丁丑諭軍機大臣等丁寶楨奏捻逆避兵東竄省垣安堵見在分路兜剿一摺東省逆匪竄近省垣因官軍防守嚴密乘間遁入章邱鄒平旋由新城迤北奔竄該處北路僅高苑博興兩縣此外多係河道該逆若自博興他竄必由臨淄樂安逸出丁寶楨見在親督王成謙等軍擬繞出臨淄樂安豫伏其前令王正起等軍緊躡其後卽著督飭各軍前截後追兩面夾擊毋令喘息惟賊勢甚眾東省兵力不敷剿辦丁寶楨雖已咨調劉銘傳一軍由莒州向穆陵關一路前進潘鼎新一軍由萊蕪向博山

一路前進仍著李鴻章迅速催令該二軍趕緊進剿通力合作爲一鼓聚殲之計東軍防守南岸勢難兼顧北岸應否將直隸東南各鎮之兵盡數調赴河干以資厚集之處著劉長佑崇厚相機布置該逆剽疾異常非合數省兵力不能盡殲醜類各該省督撫務當不分畛域會籌殄滅之方不得以追賊出境爲了事李鴻章專辦此股捻匪責無旁貸自當親臨前敵策應調度儻再任賊蔓延惟該大臣是問將此由六百里各諭令知之○諭張亮基奏賊匪闖入縣城旋經官軍擊退暨籌辦獨山荔波軍務情形各一摺安平縣城於上年九月收復後未及修葺本年正二月間屢被逆首許大八賊黨楊大獬子等乘虛竄入均經官軍擊退該逆旋由閒道復入縣城知縣喻正福等同援無及總兵趙德昌親督各軍分道進攻喻正福等亦各帶團練繼至斃賊無算遂於三月二十八

日將縣城收復賊由北門逃出竄往清鎮安平交界地方此股賊匪雖經擊退未受大創該縣民稀地曠難保不去而復來著卽嚴飭趙德昌等會同提督謝景春一軍跟蹤窮追合力夾擊以期盡絕根株至荔波地方前據張凱嵩奏稱粵軍越境收復何以張亮基尙未知悉殊不可解著懍遵本月十五日諭旨迅飭派出員弁前往協剿並將善後事宜妥籌布置其獨山一帶賊股卽著檄飭張國樑各軍認真搜剿迅圖蕝事黎平荔波等處接連粵境賊蹤出沒靡常張亮基身任黔撫自當振刷精神激勵在事文武各官實力剿擊淨埽邊氛毋得勞師糜餉日以奏報籌辦情形希圖搪塞也勉之將此由六百里諭令知之○予貴州陣亡知縣鍾毓材祭葬世職○戊寅諭內閣順天直隸各地方久旱不雨民間播種無期災歉之形已見著直隸總督順天府府尹卽飭所屬清查戶

口安插流民簡公正紳耆妥議賑恤章程具奏應需帑項由戶部頒發以供支放其各項錢糧並著查明分別蠲緩○諭軍機大臣等張之萬奏捻逆搶渡運河直趨東南清淮喫緊扼要嚴防一摺此次捻逆搶渡運河飄忽異常清淮地方自應嚴密堵剿前已諭令曾國藩派兵扼堵見在張之萬已飭總兵姚廣武等分紮順河集等處布置尙爲妥協著卽嚴督各軍認真扼剿毋得稍有疏失惟徐海一帶無兵駐守著曾國藩迅卽派兵前往堵剿以期嚴密捻蹤見雖竄至鄒平以北距清淮較遠然難保不因剿南竄張之萬務當認真布置力保完善是爲至要將此由五百里各諭令知之○諭左宗棠奏覆陳籌辦防剿情形一摺並富明阿等奏勇丁啟程分赴東陝請飭沿途接濟口糧車輛各摺片陝省捻匪勢已窮蹙見復渡渭北竄左宗棠自應遵奉疊次諭旨迅速入關將此

股就地殄除南山各峪口均與興漢可通尤當分兵堵扼以防捻匪折竄南山高連陞一軍著卽催令迅由鄖陽一路赴陝以備迎勦晉省河防仍著左宗棠妥籌兼顧所募礮手二千五百名見已據富明阿等奏稱如數募齊並勇丁自募長夫剋日啟程每名雖給付五十日鹽糧而受募遠征亟應體恤著都興阿額勒和布恩錫劉長佑趙長齡飭令經過地方官量加接濟以利遄行其調赴山東之勇丁一千五百名餘丁一百五十名營官六十二員名並備差兵一十二員名均著沿途經過之將軍府尹督撫等飭令地方官協濟車輛以速遄行需用車價准其作正開銷所需勇丁整裝及畱養銀兩卽著照富明阿等所議辦理原片一件著鈔給丁寶楨閱看將此由六百里各諭令知之○以廣壽寶珣俱爲內閣學士

廣壽由詹事寶珣由翰林院侍講學士選

○命賂秉章籌銀十萬兩濟成祿軍營

並飭各省迅解月餉○己卯廣廣東新甯縣學額四名○庚辰諭
軍機大臣等穆圖善奏陝西甘泉失守延郡喫緊保安等處賊勢
披猖見籌勦辦情形一摺陝西甘泉縣於三月二十八日被賊圍
攻縣城失守延長膚施等處均有賊蹤延郡戒嚴其保安平定靖
邊各屬復有賊酋袁炳等糾眾肆掠該省北山一帶年來尙屬安
堵何以逆蹤屢集遂至萬餘喬松年於所轄地方賊勢披猖何以
並無奏報該處地當衝要且爲甘省運解糧餉軍火衝途著穆圖
善迅卽飭令總兵胡世英督帶所部十營進紮延安將甘泉縣城
力圖克復庫克吉泰喬松年著卽速撥兵勇會合甘省所派之程
興烈各營痛加勦洗迅殄逆氛渭北捻蹤尙熾若延安一帶再任
賊縱橫勢將不可收拾喬松年能當此重咎耶甯條梁爲山陝門
戶穆圖善飭令副都統敦奇祥阿等嚴密設防著添派勁旅妥爲

堵禦毋稍大意甯夏甫經安輯如賊蹤竄近又形喫重前請調金順進省之處著穆圖善再行妥酌以重邊防並著桂成將綏遠城與陝省毗連地方迅籌豫備以防被勦北竄甘泉文武下落及此股竄撲之匪究係何股賊首何人均著喬松年查明具奏將此由六百里各諭令知之尋奏賊匪董幅祥一股在鄜州爲劉厚基所敗遂勾結土匪竄陷甘泉旋經知縣陳澤農等集團收復董幅祥復竄回甘省界內已嚴催胡世英等會合擊勦得旨著卽督飭胡世英等實力進勦並懷遵前旨嚴防綏德等處以杜回匪偷渡黃河毋稍鬆懈○辛巳 上詣 大高殿祈雨○諭內閣前因天時亢旱詔求直言原冀於國計民生有所裨益茲據都察院代奏候選直隸州知州楊廷熙奏請撤銷同文館以弭天變一摺嘽嘽數十言甚屬荒謬同文館之設歷有年所本年增習天文算學以裨

實用歷經御史張盛藻大學士倭仁先後請罷前議因其見識拘迂疊經明白宣示茲據該知州所陳十條不過撫拾陳言希圖自炫原可置之不論惟有關於風俗人心者甚大有不得不再行明示者楊廷熙因同文館之設並詆及各部院大臣試思楊廷熙以知州微員痛詆在京王大臣是何居心且謂天文算學疆臣行之則可皇上行之則不可普天之下孰非朝廷號令所及豈有疆臣可行而朝廷不可行之理又謂事在必行懇請將翰林進士科甲有職事官員撤銷尤屬謬妄國家設立科目原以登進人才以備任使曾國藩李鴻章均係翰林出身於奉旨交辦中外交涉事件從無推諉豈翰林之職專在詞賦其國家政務概可置之不問乎至所稱西教本不行於中國而總理衙門請皇上導之使行及專擅挾持啟皇上以拒諫飾非之漸等語更爲肆口詆誣情尤可惡

推原其故總由倭仁自派總理各國事務衙門行走後種種推託所致楊廷熙此摺如係倭仁授意殊失大臣之體其心固不可問卽未與聞而黨援門戶之風從此而開於世道人心大有關繫該大學士與國家休戚相關不應堅執己見著於假滿後卽到總理各國事務衙門之任會同該管王大臣等和衷商酌共濟時艱毋蹈處士虛聲有負朝廷恩遇至楊廷熙草莽無知當此求言之際朝廷寬大姑不深責恭親王寶鋆請將楊廷熙所奏十條派大臣覈議並請將該王大臣及見任各大臣均暫開總理衙門差使聽候查辦自係爲楊廷熙摺內有專擅挾持等語當此時事多艱該王大臣等當不避嫌怨力任其難豈可顧恤浮言稍涉推諉所請著毋庸議○諭軍機大臣等都興阿等奏請添設金龍頂櫃尊藏

寶錄

聖訓一摺據稱盛京

崇謨閣上層金龍櫃尊藏

寶

錄 聖訓見安設已滿擬請在金龍櫃上添設金龍頂櫃二十二

座移請 列祖 列宗 實錄 聖訓尊藏移出金龍櫃十一座

敬備 文宗顯皇帝 實錄 聖訓恭送到時敬謹尊藏等語所

籌甚妥卽著盛京工部做照原設金龍櫃式樣遴派妥員敬謹成
造金龍頂櫃二十二座以備尊藏而昭慎重將此各諭令知之○

李鴻章奏 臣於五月二十二日馳抵歸德欽奉諭旨飭 臣移營東

境居中調度 臣初慮捻逆過河如循汶上鄒滕舊路下竄嶧邳則

徐淮喫重 臣當進駐徐州如由泰安濟南東竄青萊則東境喫重

臣當進駐濟甯皆須由歸德分路見在賊已竄往泰安潘鼎新由

單縣馳抵濟甯卽由滋陽曲阜向泰安進剿劉銘傳亦拔隊赴濟

甯向東進發 臣聞守運東軍全數調往剿賊恐賊乘虛回竄飛飭

周盛波周盛傳等由曹縣拔往濟甯之長溝擇要堵扼又恐賊由

泰安折竄沂海則清江裏下河門戶可虞飛飭王永勝沈宏富兩軍拔赴宿遷暫紮董鳳高孔昭佑兩軍併扼韓莊要路豫備南路援勦劉秉璋李昭慶援鄂甫回周口臣令劉秉璋一軍暫赴濟甯休養所派南路各陸軍令臣弟昭慶馳赴徐州宿遷察看緩急會同黃翼升所部水師相機調遣臣卽督隊由虞城一帶徑赴濟甯兼顧南北軍情居中策應據探該逆分爲兩股一往濟甯迤北奔竄一向萊蕪青石關奔竄已至毛埠村等處揣度賊情似向青州一路目前可無虞北竄劉銘傳潘鼎新向有擠入登萊海隅趁勢圍逼制賊奔竄徐圖聚殲之議此次復申前說請臣商調皖豫各軍出境協守東蘇運河西岸杜其回竄銘鼎兩軍會合東軍再於東三府等處相度要隘步步逼緊使其一入不得再出卽或逸出仍與往來追躡蹙入海隅而止等語查擒匪已成流寇偏之一隅

然後會師合剿原係殲賊上策茲賊既深入東境臣軍久役疲乏

斷不敢謂蹙賊海隅之議遂有把握但與其任賊長驅各省流毒

無窮似不若誘令盤旋偏隅得辦且辦臣已密屬潘鼎新劉銘傳

儘力追躡如賊竄登萊我軍卽於膠萊咽喉設法扼逼使北不至

竄入畿疆南不得蔓延淮海局勢自較緊湊臣並絀商李鶴年酌

調張曜宋慶兩軍進紮汶上運西開河一段英翰酌調張得勝黃

秉忠程文炳各軍進紮宿遷至灘上運河西岸以備接應前敵張

之萬酌調成子河防軍及淮揚鎮水師移防清淮及阜甯之射陽

湖以杜窺竄裏下河之路惟賊勢剽悍地段太長恐有力不從心

之處如以上兩策皆辦不到亦惟有抽派各軍輪替進剿以圖逼

賊早回運西再行酌辦 上諭捻逆竄入鄒平等處李鴻章自應

進駐東境就近調度見在潘鼎新劉銘傳兩軍已赴濟甯並調周

盛波等軍扼要堵截布置尙屬周妥該大臣欲蹙之登萊海隅徐圖聚殲自是正辦第賊勢北趨應如何驅令東向使其技無所施卽著李鴻章督同劉銘傳等相機辦理以期漸偏漸緊所有張曜等軍並著該大臣面商李鶴年英翰酌量情形如能出境卽行進紮汶上等處以防分竄丁寶楨責任封圻於李鴻章抵東後務當悉心商酌力圖補救不得稍涉推諉致干重咎將此由六百里各諭令知之○是月緩徵安徽無爲等二十九州縣被水被旱上年額賦

六月癸未朔諭軍機大臣等劉崐奏勦辦齋會各匪情形一摺湖南湘鄉瀏陽兩縣齋會各匪竟敢聚眾劫殺謀逆抗官經劉崐督飭該地方官紳並派勇分投勦辦殲擒多名匪黨潰散著劉崐將逃散餘匪實力技捕並將首要各犯立限緝獲毋任一名漏網致

令餘燼復然瀏陽股匪見竄江西萬載縣交界之富溪小洞嶺劉
岷務當檄飭勇團越境剿洗不得但以分防本境爲了事並著劉
坤一派兵會剿務淨根株以杜延蔓近來湖南各屬哥老會匪到
處煽誘潛伏未動隱患甚深該撫當加意訪拏隨時懲辦固不可
操之太蹙亦不可姑息因循釀成巨患所稱力行保甲團練及責
成族長團長自行查辦之處卽著督令切實奉行以清其源不得
日久視爲具文將此由五百里各諭令知之○甲申總理各國事
務衙門奏俄人窺伺新疆請飭派大臣會同密籌辦法得旨著派
大學士六部尙書都察院左都御史會同該管王大臣妥議具奏
○河東道總督蘇廷魁奏逆捻竄渡運河見籌嚴防黃河下游得
旨著隨時偵探認真嚴防毋稍鬆懈○乙酉諭軍機大臣等崇厚
奏東省河防緊要請飭濟東道親駐河干遏守等語捻逆大股盤

踞章邱後已分股竄擾青萊有欲就食東三府之說賊蹤飄忽異常蓄謀甚狡亟應嚴密防範山東齊河以下武定府黃河一帶與東三府壤地相接該匪易於搶渡著丁寶楨派令衛榮光進駐河干調撥兵勇礮船擇要嚴防毋稍鬆懈儻武定一路喫緊卽著崇厚添派得力兵弁前往援剿以固河防近日捻蹤又竄何處各路接仗情形若何尙未見丁寶楨奏到著該撫隨時奏聞用慰廑繫將此由四百里各諭令知之○諭庫克吉泰喬松年奏近日軍情回逆屢竄陝境見籌剿辦整頓城防請停挑黑龍江官兵甘餉暫緩協解各摺片捻逆由興平南竄鄠縣大王鎮經官軍迎擊該逆仍由舊路回奔興平見在劉松山等軍均已過河躡擊卽著庫克吉泰喬松年督飭各軍實力剿辦就地殲除毋令再肆蔓延甘回分路竄陝絡繹不絕泰昌一帶復有大股回逆分擾雷正綰等軍

後路圖截糧道鳳翔之回竄近咸陽游騎已近省城著庫克吉泰
喬松年迅將省防布置嚴密不可稍涉疏懈並著檄飭劉厚基等
軍分路進剿迅殄逆氛毋令捻回勾結致辦理愈形棘手甘省異
常瘠苦陝省應協穆圖善月餉仍著喬松年勉籌接濟俟左宗棠
到陝後再行酌量辦理左宗棠此時計可行抵潼關著卽趕緊前
進將該省軍情餉糈統籌全局妥爲調度黑龍江官兵既可毋庸
挑補著庫克吉泰喬松年咨會黑龍江將軍卽行停止將此由五
百里各諭令知之○予陝西陣亡副將唐錫琮等祭葬世職○丙
戌諭軍機大臣等丁寶楨奏捻蹤東竄追剿獲勝一摺捻匪由新
城竄至平度州之馬蘭堡經丁寶楨督軍緊追鏖戰竟日將逆眾
擊敗擒斬頗多該逆向東北連夜急竄丁寶楨見駐平度居中調
遣飭令前敵各軍分投追剿惟逆股人數眾多騎又剽疾恐其誘

兵東追乘間折回膠莒南竄沂郡丁寶楨當安籌兼顧杜賊回竄不可專事尾追致賊延蔓所稱奪獲賊馬數百匹並著設法收用毋再爲賊所得東省兵力較單李鴻章尤當懷遵前諭迅飭劉銘傳等軍兼程馳赴登萊與東省會合堵剿並親赴東境就近分撥各軍杜賊南竄以期蹙諸海隅聚而殲海淮徐及裏下河一帶著曾國藩張之萬分布兵勇嚴密防堵不得以賊蹤尙遠稍涉疏懈將此由六百里各諭令知之○申禁各州縣浮收錢糧○丁亥諭軍機大臣等劉長佑奏通籌剿捻全局請合各省兵力就東省殲除張之萬奏請添籌兵餉力保清淮英翰奏調兵出境防河各一招覽奏均悉捻騎奔突飄忽官兵追逐多致落後劉長佑擬就運河晝段分守英翰派兵出境分防運河並議就東省兜圍殲除與李鴻章前奏大略相同見在東省兵數及李鴻章所調各軍恐尙

不敷分布劉長佑擬令江鄂皖豫四省各調兵一萬餘人合堵運河並由直隸於派守黃河萬餘人外加調兵勇數千助防運河英翰欲驅賊登萊分守膠萊要隘偪賊入海或分守黃運兩河合兵追逐蹙諸東省所籌均不爲無見著曾國藩李鴻章並各該省督撫等就見有兵力妥速籌辦其應如何分段防守黃運及勻撥兵力追剿之處亦著迅速布置務期就地殄除不可縱令逸出英翰所派東西分防兩路各軍布置均妥並著李鴻章酌度全局商同調遣至前敵各軍素無統領督兵大臣號令莫及諸將進止不齊難免互相觀望應否揀派威望素著大員統領前敵諸軍以一進止之處著該大臣酌量情形辦理婁雲慶計可抵鄂鮑超如病尙未痊卽著曾國藩迅飭婁雲慶接統霆軍兼程赴東歸李鴻章調遣以厚兵力劉長佑英翰原摺著鈔給曾國藩等閱看張之萬擬

於海鹽鄭宿一帶增設遊擊之師保障清淮著曾國藩添撥蘇省
得力兵將前往防守如兵力不敷調派卽著曾國藩郭柏蔭迅添
餉銀解交張之萬趕募新勇成軍往守並著李鴻章派撥重兵馳
赴沂郡杜賊南竄至裏下河一帶爲江北宗善之地本日復據御
史薛斯來奏請防守一摺著曾國藩張之萬懷遵疊次諭旨妥籌
防堵毋稍大意將此由六百里各諭令知之○諭本日據劉長佑
奏捻匪渡運東竄堪以就地聚殲業經諭令曾國藩等妥速籌辦
矣因思運河以東自山東以至江南境內地段甚長見在各路官
軍旣須合力進剿沿河分防之兵勢必不敷分布賊騎剽疾異常
若被乘虛逸出又成不了之局亟應添調兵勇同資守禦刻下江
蘇浙江江西三省尙稱安靖所有畱防之兵應可酌量調撥著曾
國藩李鴻章通籌大局如須添兵助守卽著一面奏聞一面將江

蘇浙江江西之兵酌量徵調卽令迅速到防分定地段責成統帶之員認真防守俾進剿之兵得以專力追擊不至顧此失彼辦理較有歸宿將此由六百里各諭令知之○飭江西浙江湖南湖北每年各協濟清淮軍餉銀二萬兩○已丑諭軍機大臣等李鶴年奏豫軍出境堵剿並籌防西路一摺任賴匪股竄擾青萊李鶴年見飭張曜等軍出境堵剿尙能不分畛域著於行抵東省後統歸李鴻章節制該大臣迅赴濟甯以便就近調度張總愚股匪被剿窮蹙竄豫實在意中豫省防兵止能顧商雒一路荆子關門戶洞開不可不豫爲防備著李瀚章曾國荃酌派重兵嚴密堵禦毋令闖入致干重咎將此由六百里各諭令知之○壬辰李鴻章奏臣於五月二十六日由宋啟程二十九日行抵濟甯接潘鼎新二十七日追賊至長山稟報捻逆已過濰縣其勢似趨登萊劉銘傳卽

督所部於六月初一日自濟拔行由泰安萊蕪徑趨青州爲中路
潘鼎新由濰縣昌邑赴萊州爲北路又派徐州鎮總兵董鳳高昭
通鎮總兵沈宏富馬步十五營由郟城蘭山進莒州爲南路三路
兜截而前欲偪入登萊絕地會合東軍相機扼堵如能扼之於膠
萊河一帶使其不能復出臣再抽調運防各軍輪往替紮更番進
擊如各軍尙未到齊或布紮未定而賊已回竄劉銘傳等相機兜
鈔臣督運防各軍隨地攔截使之不得遽竄運西仍須蹙入海隅
乃有殲賊之一日疊准山東撫臣丁寶楨咨函與臣等意見相合
惟任賴等逆狡猾剽悍未可易視若兵力未足兜圍而追之過緊
畫地太狹使其窺破機關勢必急圖出竄稍縱卽逝全局又乖臣
必先布運防以堵出路次扼膠萊以斷咽喉其追賊之軍未達膠
萊則須急進以偪蹙之既達膠萊則宜聯紮以圍困之業將此意

緘復丁寶楨請其至平度州後與劉銘傳潘鼎新會商就地布置無論能否堵住而制流賊之法必先能堵而後能剿也河南撫臣李鶴年已派張曜宋慶兩軍出省協守東境運河臣令該軍分紮東平以上靳口至黃河沈家口百餘里周盛波分紮開河至靳口一帶劉秉璋分紮濟甯至開河一帶楊鼎勳分紮趙村石佛至南陽湖一帶又淮安徽撫臣英翰咨覆已派黃秉鈞等水陸各軍赴宿遷運河向上下游扼紮等語臣飭李昭慶卽督所部由灘上黃林莊接守至韓莊八牖一帶臣擬仍商調湖北防軍萬人出境酌換運防再替出勁旅一二枝入東兜擊施功較易但恐賊匪撲運不動難保不折而窺黃張秋地當衝要防兵甚單可否飭下直隸督臣轉飭臬司張樹聲暫移所部進紮張秋北岸聯絡東軍妥爲布置且與臣軍隔河聲息相通策應較便實於全局有裨上諭

軍機大臣等賊勢見趨登萊李鴻章派令劉銘傳等分三路偪賊而前扼之於膠萊河一帶而先籌布運防使賊不能竄出以期聚而殲旃布置尙爲周妥惟賊蹤飄忽若乘官軍未集聞風遠颺辦理又無把握卽著李鴻章飛檄各路兵勇迅往兜擊毋失機宜丁寶楨亦當督飭東省各營會同扼剿務將此股賊匪就地剿除毋令免脫至運河防務李鶴年英翰等已各派兵分段協守李鴻章見飭李昭慶所部接守灘上一帶又商調鄂軍出境換防卽著迅速辦理該大臣以運防旣固猶恐賊折而窺黃所見亦是總兵劉景芳前已統帶所部赴齊河防守張樹聲見在大名一帶該處防務亦關緊要能否移紮張秋北岸或另籌一軍前往扼紮著劉長佑酌度辦理左宗棠帶兵入陝所部無多難於分布荆子關一路前已諭令李瀚章等派兵堵禦著李鴻章迅催赴防毋許延誤將

此由六百里各諭令知之○諭嚴樹森奏請酌募五營督同遵防川兵進剿請飭川省籌解軍械並請抽撥酉秀防軍出境助剿各摺片嚴樹森以席寶田見不赴黔前撥川湘餉銀二萬兩專歸四川籌解請飭四川總督自上年十月起截至本年四月止仍遵前旨無論何款按月籌提一萬兩共計銀七萬兩先行籌撥解赴綦江嗣後請自本年五月爲始按月籌撥銀二萬兩嚴樹森如先得此川餉七萬兩卽在黔蜀邊界團練中挑募五營教練進駐遵義五月後二萬兩月餉有著擬續練五營並請飭川省籌給軍火帳棚等件俾作五營之用駱秉章素顧大局於川黔軍事自能統籌緩急該藩司請撥之餉及軍械等件能否照數協濟及應否再行挑募各營歸該藩司統帶之處著駱秉章酌量情形妥爲辦理嚴樹森以李元度見紮三道水距賊巢甚近機有可乘惟兵力不敷

分布若飭湖南酌添數營又恐緩不濟急擬請於秀山駐防七營內抽撥五營出境助剿以竟全功所奏不爲無見著駱秉章相機調度嚴樹森於上年二月奉旨查辦事件迄今已閱年餘尙未馳赴黔省此時設詞布置又涉有意耽延藩司有地方之責著卽趕緊前進迅赴貴陽毋再任意逗畱致干咎戾將此由六百里諭知駱秉章並傳諭嚴樹森知之○直隸青滄梟匪句合飢民肆掠命萬青黎等嚴緝○甲午諭內閣倭仁奏病未痊愈請開缺調理一摺倭仁著不必給假一俟氣體可支卽以大學士在弘德殿行走其餘一切差使均著毋庸管理○諭軍機大臣等傳諭福建臺灣鎮總兵官劉明燈臺灣道吳大廷劉明燈吳大廷奏擒獲戴逆案內要犯並捕斬會首及積年著匪多名一摺臺灣地方遼闊人情獷悍自戴萬生等倡亂以來雖經官軍撲滅餘匪究未淨盡經劉

明燈吳大廷多方緝捕前後疊獲匪犯多名自臺灣北至竹塹人心安帖辦理尙屬妥協該處喜亂好動習爲故常必須設法鎮撫方可日久相安著該鎮道嚴飭地方文武各官留心訪緝有犯必懲毋令餘匪藏匿致釀亂階其安分良民兵燹餘生流離可憫尤須加意撫綏培養元氣並著該鎮道斟酌情形妥籌辦理○賞京師八旗及綠步各營官兵半月錢糧○乙未 上詣 大高殿祈雨○諭軍機大臣等丁寶楨奏追賊獲勝並布置扼剿情形一摺擒匪由海陽折回卽墨意圖從膠州一路竄出莒沂經丁寶楨催兵趕回膠州扼截所部前敵各軍亦在卽墨進剿獲勝並連夜攻撲賊營斬獲甚眾剿辦尙屬認真該逆南竄未遂必將由萊郡一路西還潘鼎新一軍業已趕到移紫昌邑惟東省兵力未厚劉銘傳董鳳高沈宏富等軍須星馳前進互爲聲援庶足以杜回竄又

恐諸將會合丁寶楨呼應不靈防截機宜聞不容髮著李鴻章卽星夜馳赴前敵就近調度以期呼應靈通迅殲羣醜儻坐失機宜必惟該大臣等是問將此由六百里各諭令知之○諭前據穆圖善奏稱陝西甘泉失守延長等處均有賊蹤當經諭令穆圖善庫克吉泰喬松年派兵進剿並諭令桂成嚴防邊界茲據桂成奏稱籌備沿邊及沿河情形一摺此股賊匪見已擾及綏米及懷遠葭州境內定邊一帶亦有賊蹤難保不竄出榆林邊境由草地東行桂成務當督飭防邊駐紮官兵嚴密遏截並飭歸化城所屬各廳文武豫籌防堵沿河一帶尤關緊要並著趙長齡添撥兵勇加意巡防不可稍涉大意穆圖善庫克吉泰喬松年尤當懷遵前諭迅速添派勁旅合力會剿務將此股賊匪就地殲除毋任竄出邊境致滋蔓延甯條梁一帶並著穆圖善添兵堵禦以固山陝門戶見

在北山一帶防勦情形如何卽著喬松年迅速馳奏以慰厯繫甯夏軍營赴歸化城採買馬匹委員穆圖善當豫行備文知照桂成以免奸匪潛迹綏遠城所屬各廳商販出口亦著趙長齡飭令該地方官詳細查明給發執照毋任奸宄勾結將此由六百里各諭令知之○丙申諭軍機大臣等宋延春奏官軍進勦迤西各路逆匪屢獲勝仗一摺雲南姚州鎮南等處賊寨林立本年春閒經署提督馬如龍督飭合國安等軍分路進勦攻破賊營甚多並克復姚州所屬之白塔街鎮南所屬之呂合城永北所屬之馬房等處其退入永北廳城之賊亦經昭通鎮兵練圍住斷賊糧道勦辦尙屬得手姚州等處賊匪日久稽誅見在官軍均已直逼姚州鎮南永北三處城下迤西一路自不難於廓清卽著宋延春傳知馬如龍乘此聲威分飭各營將弁迅圖撲滅以竟全功劉嶽昭身任滇

撫責無旁貸見值滇軍得手之時尤當趕緊赴滇妥爲調度該撫務將黔匪迅速剿除卽行帶兵前進毋稍遷延劉嶽昭未到以前所有該省籌辦兵餉各事宜宋延春仍當悉心辦理以副委任將此由五百里諭知劉嶽昭並傳諭宋延春知之○改福建陸路提標前後二營漳州鎮標右營雲霄營各遊擊爲都司興化城守左營都司爲守備裁泉州城守營都司二缺長福營右軍都司同安營都司興化城守右營守備延平城守右營守備詔安營守備各一缺並裁各營千總三十二員把總六十七員外委七十八員額外外委四十七員馬步守兵一萬六千三百三十五名增設督標中軍等四十一營每營號令兵七名楓嶺營四名○予陝西陣亡參將鄭春元祭葬世職○丁酉諭軍機大臣等李瀚章曾國荃奏派兵越境助守運河一摺見在東捻屬集登萊一帶李鴻章前奏

擬扼之於膠萊河爲聚而殲旃之計機會亟有可乘惟前敵兵力
尙恐單薄後路運防尤須布置周密李瀚章等見派譚仁芳劉維
楨兩軍馳赴歸德聽調尙能不分畛域卽著李鴻章懷遵疊次諭
旨迅赴前敵查由泰安萊蕪至青石關之沂水至秣陵關及蘭山
之十字路或係東西扼要或可潛入清心均須妥籌調度毋失機
宜如派赴膠萊之劉銘傳等軍不敷扼剿卽酌量增兵勿令前議
又成齟齬運河等處防務尤要並著飛提譚仁芳等軍迅速東下
藉助扼守該軍餉需李瀚章等已派員設局轉運務當源源接濟
毋使匱乏宋國永一軍見在何處婁雲慶曾否抵營著李鴻章斟
酌調遣毋得任令閒散陝捻雖屢經挫敗仍慮回竄豫鄂務須設
法嚴防毋稍大意將此由六百里各諭令知之○戊戌三口通商
大臣兵部左侍郎崇厚奏遵查霸州等處時有梟匪搶掠早經遴

委守備鄭明保管帶團勇馳往剿捕以期及早殲除報聞○己亥諭軍機大臣等總理各國事務衙門奏據章京張其濬稟稱接到家信內稱六月初九日突有土匪鹽匪二千餘人將蠡縣境內北五福村辛橋鎮等處三十餘村莊搶掠焚殺見竄往往任邱高陽一帶馬隊有八百餘騎大車有二百餘輛裹脅至二千餘人等語前據劉長佑奏稱順天保定天津河間各屬均有鹽匪訛索搶奪業經派兵剿捕茲據該衙門所奏情形見竄任邱等處匪黨馬隊人數已如此之多劉長佑事前既漫無防範以致匪徒突起結黨橫行若再不趕緊撲滅致令嘯聚日眾蔓延畿疆該督其能當此重咎耶著卽添派得力兵勇先將此股匪黨迅速追剿務將著名首惡悉數擒獲盡法懲辦其被脅飢民仍分別妥爲安撫此外各府所屬滋事匪徒並著分派兵勇一律拏辦毋稍延緩見在擒匪竄

擾山東北路河防正當喫緊近因天時亢旱人心不無浮動畿輔
重地關繫緊要豈可任令匪蹤出沒爲害地方神機營兵丁訓練
已久原以備緩急之用應如何酌量派撥就近協剿之處著文祥
等迅籌辦理將此各諭令知之○諭都興阿奏遼陽匪徒滋事請
暫畱洋槍隊查辦一摺遼陽旂桿堡匪首潘秉得與海城丁家峪
匪首趙希哲等演習邪教希圖煽黨滋事省城練兵無多不敷派
剿所有前調回津之洋槍隊官兵五百名著准其暫畱備剿其五
行隊兵五百名業已啟程卽著崇厚於回津時飭令歸伍以備調
遣潘秉得等股匪徒都興阿當速飭春霖會同該地方文武嚴密
掩捕務盡根株毋任滋蔓該匪黨究係演習何教必須詳慎查辦
毋得擾累平民仍著迅速查明具奏至昌圖廳降盜趙貴等又復
糾眾在法庫邊外盤踞據稱掄斃多名餘皆逃散其首匪究在何

處著該將軍卽飭令派出各員認真追剿悉數殄除儻致句結成患恐該將軍不能當此重咎也春霖所部洋槍隊俟遼陽肅清仍著都興阿遵奉前旨迅飭回津將此由四百里各諭令知之○庚子諭軍機大臣等曾國藩奏鮑超傷病深重懇准回籍一摺本日已明降諭旨允准其所部各營並令婁雲慶接統矣該提督馬步各營人數太雜紀律未嚴應如何嚴加裁汰分別撤畱之處著曾國藩李鴻章悉心籌商並著責成婁雲慶嚴加整頓毋貽他患萊州等處捻逆見竄何處所調各軍已否陸續到防著李鴻章隨時奏報以慰屢繫御史朱學篤奏請飭籌防海口等語著李鴻章丁寶楨酌量情形會商辦理原片著鈔給閱看將此由五百里各諭令知之○撥江浙漕糧粳秈米十萬石山東粟米十萬石賑濟順天直隸各屬災民○湖南瀏陽教匪平○允江南陣亡楚軍將士

合祀江甯府昭忠祠○辛丑諭軍機大臣等劉長佑奏勦辦梟匪情形一摺總兵鄧在仁等在晉州地方將梟匪擊敗匪眾紛竄經深澤等處團勇截拏多名餘匪分向東南逃散鄧在仁等已督隊跟追劉長佑復派總兵劉雲鶴統帶礮隊取道安平一帶迎頭截擊著嚴飭派出員弁覘賊所向痛加勦洗以期盡絕根株此起梟匪已有馬隊四五百步隊七八百雖擒斬近半而餘黨尙多若不就地殲除恐其徧擾完善或竄入晉疆劉長佑務當先事嚴扼毋稍大意將此諭令知之○諭張凱嵩奏擬由楚蜀赴任順道訪詢利弊籌畫軍需一摺所陳不爲無見惟滇省見無責任大吏萬不得已暫令宋延壽以臬護督張凱嵩已卸撫篆若由楚蜀入滇展轉耽延於緊要地方甚不相宜著卽酌帶親兵星速取道赴滇以副委任如有與駱秉章劉崐籌商事件自可往復函商隨時酌奪

另片奏請假回籍修墓等語覽其所奏誠屬可憐惟見值邊徼軍務喫緊未使俯如所請該督當體公爾忘私之義迅赴新任力圖報稱也將此由五百里諭令知之○李鴻章奏欽奉諭旨飭臣速赴前敵迅圖殲賊伏思臣調兵未集布防未定不得不將辦賊大致及見在情形爲我皇太后皇上詳悉陳之自賊入豫竄東臣思東省運防屢經賊撲向稱可恃遂注意嚴扼曹單豐碭舊河隄欲困之運黃之間以爲得地乃不數日而賊已渡運臣由歸德馳赴濟甯與劉銘傳面商不得已爲蹙賊登萊之計先借各省兵力協守運河西隄以圖圍制而遏回竄續奉六月初五日諭旨劉長佑英翰所陳與臣所部署均屬相符是目前辦賊舍此竟無良策臣更衡量利害之重輕與其馳逐終年流毒江皖東豫楚各省不如棄一隅以誘之與其往復運東濟泰充沂青及蘇之淮徐海

各屬均受其害不如專棄登萊以扼之膠萊河之守不密則登萊無可扼運河之守不密則膠萊仍不足恃賊蹤已向膠東事勢至此機會可圖臣立意必運隄與膠萊河兩防均已布定乃可抽兵進剿庶滅一賊少一賊賊智自困而兵力不疲屢經緘商丁寶楨屬其勿遽窮追反驅出境臣惟日夜圖維先固守局而後進兵此臣籌辦之大致也東蘇兩境運隄表長千里苟非各督撫力顧大局通力合作臣軍斷不敷用皖豫派到各軍與淮軍分守宿遷以上地段臣前已奏明見合於西岸排築長牆分哨過運東就舊牆修繕礮臺犄角護守方在漏夜興工非月餘不能蒞事而宿遷以下至清江運隄幾二百里尙無守兵臣僅調總兵王鍾華提督魯洪達水師三營分布宿遷亨濟牖下至鹽河箝口壩一帶但苦無陸師依護欽遵諭旨函商浙江撫臣馬新貽請其速派五千人北

上協守宿遷桃源運隄以補其隙尙未接覆疊准李瀚章曾國荃
咨稱已派提督譚仁芳總兵劉維楨率萬二千人劉長佑咨稱已
派臬司張樹聲率總兵余承恩等所部四五千人前來助守均尙
未得啟程日期故運防總未布滿卽暫無兵替入膠萊至膠萊河
距南北海口潘鼎新函稱二百七十里丁寶楨則云約三百里以
每營三里計之須百營布守至小亦須八十營劉銘傳等三路之
師日內先後可到然步隊止四十六營臣復擬調豫軍宋慶十二
營淮軍王永勝十營由運防續行抽往必合之丁寶楨所部東軍
三十一營始可密布丁寶楨止允以十一營相助而臣添調運防
之宋王兩軍又須牆工稍就乃可拔隊若丁寶楨盡以東軍協守
目前略可敷用未知能否連日據報賊蹤盤旋萊陽掖縣仍向東
北駛竄臣已飭劉銘傳等如賊外向當設法堵入並商請丁寶楨

移軍分扼此時運防各軍已到者築牆紮營臣須就近督飭布置而直隸湖北浙江未到者尙有二萬餘人沿途催趲照應及將來調派抽替皆臣所當主持須在濟甯居中籌辦若遽舍之前進則五省客兵何所稟承運防門戶未扃膠萊咽喉未斷臣卽親往亦無裨益而於大局轉有妨礙此臣暫難卽赴前敵之實情也諭旨又以前敵各軍應否揀派統領大員令臣酌量辦理查臣部湘淮各將久共戰陣素相輯睦號令尙無不齊此次派兵入東臣因直隸提督劉銘傳與潘鼎新同建防守運河進扼膠萊之議曾令該提督察酌前敵情形妥籌調派隨時會商丁寶楨協同東軍籌辦膠萊一帶扼剿事宜但使諸將力所能勉臣兩牘交催當不致誤一俟各省調兵到齊運河膠萊兩防布置略定卽抽選勁旅移營前敵督飭進剿以期聚殲醜類上諭捻蹤旣入登萊官軍不在

追逐先重堵截自係正辦該大臣因籌辦運防未能卽赴前敵著先責成劉銘傳統率各路援軍會同丁寶楨實力堵剿以期漸次兜圍儻有堵禦不力卽著該大臣據實嚴參以肅軍律李鴻章俟添調既齊布置既固仍著馳赴前敵籌督聚殲切勿徒託空言致負委任將此由六百里諭令知之○諭成祿奏攻剿肅城情形並催運敦煌縣糧石各摺片肅州賊匪屢次出撲官軍營盤把總劉王江陣斬首逆賊氣大索該提督正可乘此機會督軍進攻迅圖克復堅城毋再遷延貽誤王仁和所部六營前經楊岳斌改調回省見在肅城攻剿喫緊著穆圖善卽飭令該軍仍紮肅州進剿所有黃祖淦王仁和兩軍均著成祿節制以一事權兩軍旣如所請歸併節制之後所稱哈密各處尙可分營兼顧自當實力籌撥不准徒託空言文麟久住高臺屢經降旨嚴催尙復逗畱不進殊堪

痛恨著卽懷遵疊諭克日馳赴新任儻再藉詞觀望自問當得何
罪敦煌縣倉穀著穆圖善成祿迅飭該地方官運赴巴里坤以資
接濟將此由五百里各諭令知之○添派侍郎毛昶熙龐鍾璐徐
樹銘會同賈楨辦理五城練勇局務○以畿內亢旱撥廣東福建
江西釐捐銀三十五萬兩浙海關海兩關洋稅銀三十五萬兩備
賑需○飭催四川等省欠解成祿軍餉○癸卯諭軍機大臣等前
因鮑超傷病未痊准其回籍調理所部各營令婁雲慶接統並諭
令曾國藩李鴻章將該部嚴加裁汰分別撤畱茲據譚廷襄奏此
軍人數較眾內多降勇一議遣撤勢必藉端索餉枝節橫生止可
議分不可議撤等語所奏不爲無見著曾國藩李鴻章設法籌辦
總期駕馭得宜毋滋事端是爲至要婁雲慶統領此軍能否壓服
抑作如何分統之處並著曾國藩等妥酌具奏譚廷襄原摺著鈔

給閱看將此由五百里各諭令知之○諭譚廷襄奏直隸鹽梟土匪蠢動擬請官兵緩赴東省防河迅將匪眾撲滅一摺所稱鹽梟土匪滋擾情形與歷次劉長佑等陳奏大略相同所請直隸防河之兵暫緩赴東先清本境自係爲亟願畿疆起見惟東省匪勢未衰防河至關緊要前據劉長佑奏稱自范縣至張秋派唐訓方統帶六營赴防自張秋至齊河派劉景芳統帶六營赴防原期扼守河閒密益加密見在直隸梟匪土匪同時蠢動亦宜乘其初起迅速剪除以遏亂萌鄧在仁劉雲鶴等剿賊雖疊次獲勝尙恐兵力較單不足以盡殲醜類著劉長佑斟酌情形如兵力不敷或就近將劉景芳暫行調回先將直境之賊辦竣再令赴防如劉景芳調回河防稍覺空虛著與崇厚妥商兼顧毋誤事機原摺著鈔給閱看將此諭令知之○諭穆圖善奏西路剿匪獲捷並華亭縣失守

各摺片米拉滿回匪素稱強悍動輒滋事此次官軍雖經獲勝尙未能擣穴擒渠該署督當俟其窮蹙悔罪時再行議撫不可豫設招降之見草率了事華亭縣城失守已據喬松年奏稱克復該縣爲赴陝孔道甘回屢由北路竄陝穆圖善當速籌添兵馳往扼守嚴密堵截不可以鄰爲壑被害紳民並經制孟宗孔傷死情形均著查明具奏將此諭令知之○予甘肅殉難知縣張衍福等祭葬世職○甲辰諭軍機大臣等丁寶楨奏分築膠萊河牆賊勢南趨一摺所陳籌辦情形與李鴻章前奏辦法略同惟防局見甫草創賊眾已遂飽掠若不兼籌截剿恐河防布置終歸虛設見在東省兵力已厚卽著李鴻章等統籌全局防剿兼施毋任該逆縱橫無人之境反得養其精銳軍情變幻靡常朝廷不爲遙制總之設防原爲兜剿之計若非進紮迎剿恐防務未固賊蹤突至該大臣等

總須計出萬全方爲妥善將此由六百里各諭令知之○諭庫克吉泰喬松年奏朝邑截剿竄賊獲勝一摺捻逆由富平蒲城一帶窺伺同朝經劉松山安住等軍緊蹙東追鈔過賊前奮勇截擊殺賊甚夥該逆仍竄回蒲城舊路此股賊匪於渭北一帶盤旋並窺伺同朝爲渡黃之計其垂涎山右實在意中劉松山此次力疾扼剿實屬奮勇可嘉著庫克吉泰喬松年督飭該軍會同安住等迅由蒲城蹙蹤追擊務期就地殲除毋任紛竄左宗棠計已入關著卽迅督所部合力兜圍以圖蒞事其北山一帶懷遠葭州等處回匪剿辦情形並著喬松年等隨時馳奏將此由五百里各諭令知之○予陝西陣亡參將邵得勝安徽殉難通判陸京等祭葬世職○乙巳諭軍機大臣等都興阿奏遼陽邪匪逃逸已令洋槍隊啟程一摺旂桿堡邪匪潘秉得等在遼陽滋擾據該州城守尉萬福

等續稟聞拏逃遁旋竄于家店經團練擊散不知去向並令洋槍隊卽由遼啟程回津等語所稟情形殊屬含糊是否該城守尉知州前稟過涉驚惶抑或希圖將瀋陽所備兵車卽令過站藉端巧避兵差著都興阿查明參奏其拏獲潘秉得之母張氏並賈汶舉等四名卽著嚴行審訊按律懲辦在逃匪犯潘秉得等都與阿當督飭弁兵悉數接捕務絕根株春霖所部洋槍隊業經啟程回津應否調赴防所或卽令歸伍之處著崇厚妥籌調度將此各諭令知之尋都興阿奏查萬福等係因聞賊渡河故將城暫閉並非無故驚惶應請免議逸犯潘秉得仍嚴飭旗民一體接捕報聞○添建浙江駐防滿營衙署○丁未諭軍機大臣等劉長佑奏梟匪敗竄擬就見有兵團悉力追截並散匪竄向東南各摺片直隸晉州等處梟匪經劉雲鶴鄧在仁等分投追剿並經各州縣團勇截拏

陸續捕獲多名亟應悉力殲除盡絕根株著劉長佑督飭各兵勇認真接緝毋任敗殘之匪潛匿紛逃致貽後患直境之兵見數剿辦宣化等處練軍計日可抵河閒正定等處足資鎮攝神機營挑備之兵即可暫緩啟程劉景芳一軍應否仍令扼守河干不必調回協剿並著妥慎斟酌匪首楊三旣已陣斃餘匪多係山東冠縣館陶德州等處之人見旣徑向東南竄去勢必潛回舊巢山東武定等處梟匪充斥又逼近捻氛難保不勾結爲患著丁寶楨嚴飭該地方文武各官實力按捕劉長佑一面派兵馳赴東境會同查拏以期悉數弋獲杜絕亂萌將此各諭令知之○李鴻章奏據報任賴逆股於六月初九初十等日由萊陽北趨招遠黃縣境內劉銘傳十三日督率所部行抵平度州之瓦廟口潘鼎新亦移紮掖縣之新河口會勘膠萊河道形勢南北海口相距二百八十餘里

惟萊州海倉口外河灘七八十里河水沮洳萬難築牆人馬皆能
徑渡潘鼎新擬除去海倉三十里由新河西紮至濰河東岸就平
地築牆竈濠三十餘里設險限制其自新河南至麻灣海口是爲
膠萊正河閒段淤淺並有無水之處見與撫臣丁寶楨籌議因人
數過單每營暫守五里劉銘傳所部自新河南紮至大成寺一百
一十里董鳳高沈宏富自大成寺紮至吳家牐一帶約六十里東
軍自吳家牐接守至南海口約八十里俱於西岸增修長牆其濰
河西自夏店至海口水深泥淖亦未可空虛擬請東軍分守以補
其隙劉銘傳潘鼎新十六日來信見已及時興築須二十日纔就
董鳳高沈宏富十八九等日計可到防丁寶楨亦擬調回東軍各
營分投趕辦臣慮地廣力薄設賊悉眾回撲牆壘未就猝爲所乘
昨已抽豫軍宋慶十二營由東平運防淮軍王永勝十營由宿遷

運防分起馳赴膠萊河會同劉銘傳等相機策應屢據登州府縣稟報捻蹤仍游弋福山甯海一帶崇厚已派洋槍隊五百餘名防守煙臺口岸當不致遽有侵擾若賊在登境盤旋月餘我軍先後畢集膠河之防可固運河之守益嚴臣再酌量抽替節節進剿斯爲穩著萬一膠萊布置未及周到賊或乘閒突出而運河長牆漸就根基已固可嚴扼歸路徐圖收拾是運防亦甚緊要見既抽宋慶王永勝兩軍東去自沈家口至靳口八十餘里暫令張曜豫軍勻紮自灘上至韓莊百數十里仍令李昭慶淮軍勻紮東境各段長牆廠有眉目蘇境亦正在興工須俟湖北派出譚仁芳劉維楨二軍直隸派出張樹聲一軍到後乃可再行設法抽派續赴膠萊臣當隨時察奪情形妥籌辦理上諭劉銘傳等軍與丁寶楨所部各營見擬分段扼守膠萊河築牆堵截計日興工固係正辦惟

前據丁寶楨奏稱所分地段甫經興工賊已由福山回竄卽墨距膠甚近東軍僅五千餘人恐難杜其奔突等語就目下情形而論賊之竄出膠州已在意中李鴻章見調宋慶王永勝兩軍前赴膠萊河策應著英翰李鶴年協同嚴催兼程前進與丁寶楨所部及銘鼎兩軍協力截剿無執分段扼守之見致令飽掠竄逸其張曜譚仁芳劉維楨張樹聲各軍著李瀚章曾國荃劉長佑李鶴年迅飭赴防李鴻章一面催提毋稍延誤至李鴻章所設運防丁寶楨所設膠萊河防均待月餘之久賊蹤飄忽勢必不肯坐困登萊似應量爲變通節節橫擊或可漸挫其鋒著該大臣等妥酌籌辦煙臺防兵是否足用奉天所謂之天津洋槍隊五百名昨已據都興阿奏令回津著崇厚探訪情形妥爲調度鮑超各營婁雲慶曾否接統或由該大臣催提此軍馳赴東省以厚兵力之處亦著隨時

酌奏將此由六百里各諭令知之○諭順天府嚴察官吏辦災弊
竇○廣山東夏津湖北蘄水縣學額各三名○予直隸殉難知縣
唐盛建祠典史陳虎臣等附祀○免直隸昌平州本年例貢果品
○己酉雨○諭軍機大臣等李瀚章曾國荃奏請飭豫省撥軍馳
防荆子關一摺張逆盤旋渭北蓄意東趨荆子關一路自應添兵
扼守惟豫中宋慶張曜等軍見已調赴東省馬德昭段廣瀛等軍
亦由李鶴年派赴閩鄉前以豫省無兵可籌特飭鄂中派軍以固
腹地該署督等何得以道途遙遠軍行無大將督率等語意存諉
卸左宗棠等不日即可入關戰事方亟所有荆子關一路仍著李
瀚章曾國荃迅派得力人員統帶勁兵星速前行認真扼紮儻該
署督等堅持已見徒藉口於無兵可撥致捻蹤乘間竄出蹂躪中
原是該署督等不顧大局朝廷斷不能曲貸也懍之戒之將此由

五百里各諭令知之○諭前因荆子關門戶洞開諭令李瀚章曾國荃派兵堵禦茲據奏稱譚仁芳等軍調赴東境鄂中見無可調之軍請仍飭河南撫臣酌撥一軍防守荆子關等語河南兵力本單宋慶等軍見又派赴東境豫省亦屬無兵可撥本日已諭李瀚章曾國荃懷遵前旨抽撥兵勇馳赴荆子關嚴密守禦李鴻章亦當統籌兼顧毋令張逆乘間回竄鄂境前據譚廷襄奏鮑超一軍止可議分不可議撤當諭令曾國藩李鴻章設法籌辦婁雲慶計可到營鮑超所部作何統率未據奏報或卽令該軍分扼荆子關及另作調遣之處著曾國藩李鴻章迅籌妥辦毋涉虛糜致貽他患將此由五百里各諭令知之○辛亥以孟秋時享 太廟 上前期親詣行禮○是月蠲免陝西乾州等四十五州廳縣被災被擾新舊額賦並展緩邠州民欠折徵銀